

MARKUQ é Gabú Danglù Laiká (The Gospel of Mark)

Yesuq É Matú Hkyô Htong Byî É Hkyô

Mht 3:1-12; Luk 3:1-18; Yhn 1:19-28

¹ Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haû myiqhtoi Esai-aq laiká má:

"Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê."[☆]

ga lú le,

³ "Haû yoso má, byù rayuq garû taî é htê gi,

'Haû Yhumsing é matú, hkyô hen to keq; Yhâng é matú hkyô lhoq nyhang to keq."[☆]

ga lú le, kê tô é eq rajung za nghut lhê. ⁴ Haû mù, Wui-myhup Sará Yohan gi, yoso hkaû má jé lé lú, wui-myhup hkám byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri. ⁵ Haû hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri. ⁶ Yohan gi, gola-uq shomaú èq saî é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri. ⁷ Yhang taî kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lhang

☆ 1:2 Mal 3:1 ☆ 1:3 Esai 40:3

a gingdán é nghut lhê. ⁸ Ngò gi, nungmoq lé, wui eq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

*Yesuq, Wui-myhup Hkâm Yu É Hkyô Eq Gunglaú Huí É Hkyô
Mht 3:13-17; 4:1-11; Luk 3:21-22; 4:1-13*

⁹ Haú yoq má, Yesuq gi, Galile mau Nazaret và mai lé jé mù, Yohan chyáng Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é đông mai, Yhang ahtoq má gyó lé lo é lé le, Yhang myang kat ri. ¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtë htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri. ¹³ Haú mù, Yhang gi, yoso má myi xê nyí nyi luí, Tsadán eq gunglaú é huí ri; tân jung yosô zè pé le, Yhang eq rahá nghut nyi ri; maumang lagyô pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haú gabú danglù lé lumjîng keq hkoi." ga luí, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô lai ló le, Simun eq yhanggu Andre nhiktâng, nhông má gùn dú nyí kô é lé, myang ri; haú nhik gi, ngozo kóng zo su nhik nghut akô. ¹⁷ Haú mù, Yesuq gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga tâi ri. ¹⁸ Haú hkûn, yhangnhik

gi, radá dâm, gùn pé lé tô pyâm to luî, Yhang htâng cháng bekô nghut ri.

¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaî hkaû má gùn hpo nyî kô é lé, myang ri. ²⁰ Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyang pé lé, lhaî hkaû má nyhi pyâm to kôluî, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyî nyî jé jáng, Yesuq gi, tarajong má wang ê mù, mhoqshit hi ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. ²³ Haú u lé, agè ashop é nat wang júng é byù rayuq tarajong má bo lom nyî luî, wut garû kat é gi, ²⁴ "Nazaret wà byù Yesuq ê, ngamoq gi, Nàng eq haî sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

²⁵ Haú hkûn, Yesuq gi, "Hkâjop, yhâng chyang mai htoq ló aq." ga yhang lé tân kat ri. ²⁶ Haú hkûn, agè ashop é nat haú gi, byù haú yuq lé wum kat langhtân nhâng luî, htê mó èq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lhang gyo byî akô nghut ri." ga luî, taî lhùm bum akô nghut ri. ²⁸ Yesuq eq sêng é

ludang gi, Galile mau jàm shoq, yang é dông byo myín ló bê nghut ri.

Byù Myo Myo Lé, Yesuq Lhoq Gê Byî É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luî, haú hkûn jáng, Yakuq eq Yohan nhik le mù, Simun eq Andre nhiktâng é yhûm má wang e ló bekô nghut ri. ³⁰ Simûn é yhâng-aumó gi, gyai yhang nò leq tô é nghut mù luî, yhangmoq gi, Yesuq lé haú yuq no é hkyô lhom taí kyô akô nghut ri. ³¹ Haú mù luî, Yesuq gi, yhâng chyáng huî ê mù, yhâng é loq má zui luî tu tsung ri; haú hkûn jáng, nò ge byuq luî, yhang gi, yhangmoq lé gaí tso gaí huq bê nghut ri.

³² Haú nyí buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huî é bang myo myo lé lhoq gê byî ri; nat gang myo myo lé le, hkat htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lhang a bó shimá, toq mù, gaú é jowò ralhumm má htoq ê luî, kyû ê dúng ri.

³⁶ Simun eq yhâng é luzúm wuî kúm gi, Yhang lé châng hô kômù, ³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luî, taí kyô akô nghut ri.

³⁸ Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô râ matú ê sháng, hau é matú ngò lé é ru nghut lhê." ga tû taí ri. ³⁹ Haú mù luî, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byî wún ri.

*Manggâm Dap Sû Lé, Yesuq Lhoq Gê Byî É Hkyô**Mht 8:1-4; Luk 5:12-16*

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo luí, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí ri. ⁴² Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri. ⁴⁵ Nghut kôlhang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaû má de de a ge wang ló lo mù, shinggan mâ é chamchuyiui dut é jowò má za nyi nyi ri. Nghut kôlhang, byu pé gi, jowò hkangmó mai Yhâng chyáng ru zîng lé nyi bum ashí kó nghut ri.

2

*Gùngjum Shî Sû Lé, Yesuq Lhoq Gê Byî É Hkyô**Mht 9:1-8; Luk 5:17-26*

¹ Buinyì hkâ-myháng a myáng má, Yesuq gi, Kaperna-um wà má dum wang lò jáng, Yhang yhûm dum taû jé lô bê gâ é hkyô lé, byu pé wó gyô bum akô nghut ri. ² Haú mù, byù myo myo zîng lé lô kôluí, yhúmhaû má jowò a joq lô é htoq agó, hkumtot má lháng a joq lo nghut ri; Yesuq gi, yhangmoq lé mungdang hko kyô nyi ri. ³ Haú hkûn, byù myi yuq gi, gùngjum shî sù rayuq lé chôm dang waq luí, Yhâng chyáng lé lo akô. ⁴ Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí

jé ê kô é yanmai, Yesuq é u htoq mâ é yhumhkông lé dong htông yù luî, gùngjum shî sù lé taphkang eq roq hkyô kat akô nghut ri. ⁵ Yesuq gi, yhangmoq é lumjîng myit lé byu-myàng jáng, gùngjum shî sù lé, "Ngá zo ê, náng é yubak mara lé hkyut pyám byi bê." ga taî ri.

⁶ Haú hkûn, tarâ sará pé ra-am gi, haú má zung to kôluî, yhangmoq é i-myt unghkaû má, ⁷ "Byù shí yuq gi, haî mù luî haû su gâ lhê laq? Yhang gi, Garai Gasang lé rhoî dang taî nyi ri; Garai Gasang mai lai luî, ó yuq wá mara wó hkyut byi râ lhú?" ga luî, myit són wuî nyi bum akô nghut ri.

⁸ Yesuq gi, yhangmoq é unghkaû má myit wú nyî kô é hkyô lé, radá dâm Yhang é myit mai sé mù, "Nungmoq é i-myt hkaû má, haî mù haû su nghû myit són wuî nyi bum akô lhú? ⁹ Haû gùngjum shî sù lé, 'Náng é yubak mara lé hkyut pyám byi bê.' nghû taî é dang eq, 'Toq aq, náng é taphkang lé yù mù, hkyô so aq.' nghû taî râ má, hká hkun je taî lui lhê lhú? ¹⁰ Nghut kôlhâng, haû Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga, yhangmoq lé taî kat ri. ¹¹ Hau htâng, Yhang gi, haû gùngjum shî sù lé, "Ngò, nang lé taí bá, toq aq, náng é taphkang lé yu chûng luî, yhûm taû ló aq hkoi." ga taî ri. ¹² Haú yuq gi, toq mù, yhâng é taphkang lé yu chûng luî, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkangmó gi, mauhong bùm kômù, "Isû é hkyô gi, hkâ-nhám lháng a myàng wú shi." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô
Mht 9:9-13; Luk 5:27-32

* 2:10 Byu Yhangzo gâ é gi, Yesuq Yhânggùng yhang lé le taî é nghut lhê, Mesaia lé le taî é nghut lhê.

¹³ Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri. ¹⁴ Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luî, "Ngá htâng cháng aq." ga taí ri. Haú hkûn, Lewiq gi, toq luî, Yhang htâng cháng bê nghut ri.

¹⁵ Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luî, kang guq bang eq yubak dap bang eq rahá zo shuq nyi lhê lhú?" ga myî bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nõhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taí kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haí mù a gám kô é lhú?" ga luî, myî akô nghut ri.

¹⁹ Haú hkûn, Yesuq tû taí é gi, "Bíng pé gi, lusik eq rahá nghut nyi tô ashî hkûn, zoshuq hkâsu wó gám râ lhú? Yhangmoq gi, lusik eq rahá nghut nyi é u lé, zoshuq

gám kó râ a nghut. ²⁰ Nghut kôlhang, lusik lé yhangmoq chyáng mai shuî yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

²¹ Ó yuq le, mebu xau má pán sik èq a lhaq hpo wú kó; haû su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. ²² Haû eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luî, tsibiyiq wing eq shokuq htûng htên byuq râ nghut lhê. Haû mù, tsibiyiq wing asik gi, shokuq htûng sik má za ge kat é nghut lhê.

Bánno Buinyi É Yhumsîng

Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô lai ló é hkûn, Yhâng é chángzô pé gi, kyôshi ratsuí langshap yu akô nghut ri. ²⁴ Haû mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lú?" ga taí akô.

²⁵ Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luî, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú?" ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhkaû má wang ê mù, hkyangjông pé mai lai luî, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tû taí ri.

²⁷ Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haû mù, haû Byu Yhangzo gi, haû Bánno buinyi é Yhumsîng lháng nghut lhê." ga xoq taí ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to lánq ri. ² Haú hkûn, haú má nyi tô é bang ra-am gi, Bánno buinyì má, Yesuq mai haú yuq lé lhoq gê byi râ lhú ga, mara hûn râ matú gyám wú nyi akô nghut ri. ³ Yesuq gi, haú loq jum shî sù lé, "Banshoq bâng é hí má, toq yap shit aq." ga taí kat ri.

⁴ Hau htâng, Yhang gi, haú má nyi tô é bang lé, "Bánno buinyì má, ge é muzó kut râ, a ge é muzó kut râ, byù asak hkyî râ eq byù sat râ hkyô pé má, hká lhum kut le sheq tarâ wang lhê lhú?" ga myî kat jáng, yhangmoq kúm gi, jit le a ga kó nghut ri.

⁵ Haú mù, Yhang gi, nhik-yô nau é myit èq haú bang lé lhîng wú mù, yhangmoq myit htan é hkyô lé, wú yón luî, haú loq jum shî sù lé, "Náng é loq nyhang kat aq." ga taí kat jáng, haú yuq gi, loq nyhang kat luî, yhâng é loq gi, shoq za ge byuq bê nghut ri. ⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhûm bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri. ⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. ⁹⁻¹⁰ Yesuq gi, byù myo myo lé lhoq gê byî é yanmai, nòhpyo hui to bang gi, Yhang lé wó záng shoq ga, chyîn chyap wang ló bum akô. Byù lûm myo luî, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhaî ralhum hen to nhang ri. ¹¹ Agè

ashop é nat pé gi, Yhang lé myàng hkanmó, Yhâng é hí má lêng ngop to luî, "Nàng gi, Garai Gasâng é Yhangzo nghut ri." ga luî, taî garû akô. ¹² Nghut kôlhang, Yesuq gi, Yhang ó yuq nghut é hkyô lé a taî byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luî, haú bang gi, Yhâng chyáng jé lé lo bum akô nghut ri. ¹⁴ Haú hkûn, Yesuq gi, byù raxe í yuq lé hkyin yù luî, lagyo ayá byî ri; haú bang gi, Yhang eq rahá nyì râ matú le, mungdang hkô râ matú Yhang nhang htoq kat râ eq, ¹⁵ nat gâng pé lé hkat htoq râ ahko ahkáng wó râ matú le, nghut akô nghut ri. ¹⁶ Haú raxe í yuq gi, Simun (Yesuq mai Petruq ga mying myhíng byi sù); ¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga mying myhíng byî ri; hau é lichyúm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq, ¹⁹ Yhang lé ap pyám râ sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhùm má wang ló le, byù ajùm ayò dum zing lé lô kômù, Yhang eq Yhang é chángzô pé gi, zang zo hkying lháng a wó kó nghut ri. ²¹ Yhâng é yhumbyù wuì gi, haú hkyô lé wó gyo kôjáng, "Yhang, myit a gying lo nghut ri." ga luî, Yhang lé hung shuî yù râ matú, e akô nghut ri.

* 3:18 Zelutuq gâ é lichyúm gi, yhumsing zui saî é hkyô má gyai yhang myit lòm shironq é sù lé gâ lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

²² Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaû é wum-o a-tsam eq za, nat gâng pé lé hkat htoq pyâm é nghut ri." ga taî bum akô nghut ri.

²³ Haû mù luî, Yesuq, yhangmoq lé wut yù mù, dangtú dong taî é gi, "Tsadán gi, Tsadán lé hkâsu kut wó hkat htoq râ lúh? ²⁴ Mingdán ralhú gi, ahkaû má byoq gâng lhûm nyi kô é nghut jáng, mingdán haû wó gîng nyi râ a nghut. ²⁵ Yhumhtu ralhú má le, ikun byù yhangchang byoq gâng lhûm nyi é nghut le gi, yhumhtu haû wó gîng nyi râ a nghut. ²⁶ Haû eq rajung za, Tsadán le, yhanggùng yhang lhoq hpyoq luî, gam hkoq nyi é nghut le gi, yhang wó nyi nyi râ a nghut, htâm byuq râ za nghut lhê. ²⁷ Ó yuq nghut kôle, wum-o bò sù lé hí tui zing pyâm é a nghut le gi, yhang é yhûm má lú wâng mù, yhang é sutzè lé wó lú yú râ a nghut: Haú yuq lé hí tuî zing pyám jáng sheq, yhang é sutzè lé wó lú yú râ a nghut lhê. ²⁸ Ngò, nungmoq lé teng za taî kôlé, byu pé kut shut é mara banshoq eq rhoî dang taî pyâm é pé lé gi, mara wó hkyut pyám byî lhê. ²⁹ Nghut kôhang, haû Chyoiyúng Woi-nyí lé rhoî dang taî pyâm é sù gi, hkâ-nhám le, mara hkyut byî é wó hui râ a nghut; haú yuq gi, ahtum abyuq yubak wó sù nghut nyi ri." gâ ri.

³⁰ Yhang haû su ga taî é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluî, Yesuq htoq lô râ matú, byù rayuq lé wang taî nhang akô nghut ri. ³² Byù ajùm ayò gi, Yhâng é lhîngkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui

naù luí, shinggan má láng bum akô." ga taí kyô akô nghut ri.

³³ Haù hkûn, Yhang gi, "Ô pé gi, Ngá nu eq Ngá gu pé nghut akô lú?" ga myi kat ri.

³⁴ Hau htâng, Yhang gi, Yhâng é lhîngkhyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wuì nghut bê! ³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú

Mht 13:1-23; Luk 8:4-15

¹ Yesuq gi, nhông yàm má radàm dum mhoqshit hi ló bê nghut ri. Haù hkûn, Yhâng é lhîngkhyuq má byù moq mó lûm yán zîng lé lo bùm kô é yanmai, Yhang gi, nhông hkaù má é lhaí má wang zung tô ri; haù u lé, byù moq mó gi, nhông yàm gin-gau htoq má nyi míng bum akô nghut ri. ² Yhang gi, haù bang lé, dangtú pé dông myo myo mhoqshit byî nyi ri; Yhang mhoqshit é má, ³ "Gyo wú keq! Kyô hkyó sù rayuq gi, kyôshi san râ gâ htoq e ló ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, luì za yuq htoq ló kôle, ⁶ amyit a wó chîn hing é nghut mù, buì htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaù má gyó ang luí, zubyap haù pé kô lò mù, wup pyâm é yanmai, ashi a wó zui nghut ri. ⁸ Nghut kôlhang, ra-am gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

⁹ Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

¹⁰ Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myî akô. ¹¹ Haú hkûn, Yhang, yhangmoq lé taî kyô é gi, "Garai Gasâng é mingdán eq sêng é sê gyo wuí é hkyô lé sé gyo râ ahko ahkáng, nungmoq lé byî to lugù nghut bê. Nghut kôlhang, góbâng é matú gi, jung hkanmó lé dangtú dông chyat taî é nghut lhê. ¹² Haú mù luî,

'Yhangmoq gi, myang nyi kôlhang, a wú sé kó, gyô nyi kôlhang, a sê gyo kó;
sé wú sê gyo kô é ru nghut le gi, lhîng taú lò mù, mara hkyut pyám byî é hui kó râ nghut lhê!''[☆]

gâ ri." ga tô ri.

¹³ Hau htâng, Yhang, yhangmoq lé dum xoq taî é gi, "Nungmoq, dangtú shî lé a sê gyo kô é nghut le gi, gotú dangtú pé lé hkâsu kut ung sê gyo kó râ lhú? ¹⁴ Yò mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byî ri. ¹⁶ Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit eq hap yù akô. ¹⁷ Nghut kôlhang, yhangmoq gi, amyit a wó chîn é yanmai, razup zo za yuq kômù, mungdang é yanmai, wúhke é eq zing-rî é pé hui kôjáng, hân hân htak ló byuq kó râ nghut lhê. ¹⁸ Dum ra-am nghut jáng, zugyóm hkaú má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹ shí ipyat lhê é myit wui myit hke hkyô, hkyô shuí nghoq jung ngùn hîng zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup

[☆] 4:12 Esai 6:9-10

pyâm é yanmai, ashi a wó zui dut kó râ nghut lhê. ²⁰ Ra-am kúm gi, myihpún bo é jang má gyô âng é kyôshi eq wuí akô; yhangmoq gi, haû mungdang lé gyô yù mù, lhom yù luî, sân kat é htoq sum xê tú, hkyuq xê tú, rashô tú lhang myo shoq ashi zuî lò kó râ nghut lhê." gâ ri.

Myibung Htûn É Hkyô

Luk 8:16-18

²¹ Yesuq, yhangmoq lé xoq taî é gi, "Nungmoq gi, myibung lé yù mù, tsungjang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô lú? ²² Hkâsu mù gâ le, haq tô é zè haî jung le htoq ze lò râ eq, zaú tô é pé haî jung le byông htoq lô râ nghut lhê. ²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taî é gi, "Nungmoq gi, wó gyô yu é hkyô lé rago myit wú keq; nungmoq lik byî é bung èq, nungmoq lé dum lik byi râ nghut lhê; hau htoq lhang myo shoq wó kó râ nghut lhê. ²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taî é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù haú yuq gi, myín lé yhup tô é nghut nghut, nyî lé toq lo é nghut nghut, kyôshi gi, zuî htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luî, ashi zui shoq kut é nghut lhê. ²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

*Angshi Cham Lé Dangtú Yu É Hkyô**Mht 13:31-32; Luk 13:18-19*

³⁰ Yesuq dum xoq taí é gi, "Garai Gasâng é mingdán lé, hai èq lhoq whuí wú râ lhú? Haí jung dangtú yù mù, shit wú râ lhú?" ³¹ Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishúm hkaú má, maulat nghoq zô pé lé wó zung nô nyi é nghut lhê." gâ ri.

³³ Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é haí lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkanmó é lichyúm lé taí sân kyô ri.

*Laidun Mó Lé, Yesuq Lhoq Zîm Pyâm É Hkyô**Mht 8:23-27; Luk 8:22-25*

³⁵ Haú nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri. ³⁶ Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gú dap ló bekô; gotú lhai pé le, yhangmoq eq rahá bo gú dap ló akô nghut ri. ³⁷ Haú u lé, laidun mó jé lô mù, wuìlhêng hta toq lô luí, lhai má lo bat hâng é yanmai, wuì byíng lô bê nghut ri. ³⁸ Haú hkûn, Yesuq gi, lhai htâng má uhkuq hkuq mù yhup myhî tô ri; haú chángzô pé gi, Yhang lé nhaú pun luí "Sarâ ê, nga-nhúng myup shi ló râ dut é lé, nàng a chiq byi lhú?" ga taí akô nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num ló byuq luí, banshoq zîm byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Haî mù, haû-í gyuq bum akô lúh? Nungmoq gi, lumjínq myit a bò shi kó lúh?" ga taî ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lê lhà? Laì eq wuillhêng pé lhang gi, Yhâng é dang lé gyo byî ri-nhung!" ga luî, rayuq eq rayuq myî lhum bum akô nghut ri.

5

Nat Gang Hkat Htoq Pyâm É Hkyô

Mht 8:28-34; Luk 8:26-39

¹ Yhangmoq gi, nhông hé hpoq mâ é Gerase byu pé é mau má jé dap e ló akô. ² Yesuq lhaî mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huî ri. ³ Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuî èq lhang a wó tuî zing wú kó nghut ri. ⁴ Hkâsu mù gâ le, adàm dàm, yhâng é loq eq hkyî má shamtoq-tuî èq tuî tô wú kôlhang, yhang gi, loq mâ é shamtoq-tui pé lé llang hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dún cheq wún ri.

⁶ Yhang gi, Yesuq lé, we mai myang kat jáng, din e ló mù, Yhâng é hí má hkyihput htuq ngop luî, ⁷ htê mó èq, "Myhang htâng é Garaî Yhangzo Yesuq ê! Nàng gi, ngò eq haî sêng lhê lúh? Nàng gi, ngo lé a zing-ri râ matú, Garaî Gasâng hí má danggidiq byi laq." ga taî garû ri. ⁸ Haî mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taî kat é yanmai nghut ri.

⁹ Hau htâng, Yesuq gi, "Náng myîng haî gâ lhê?" ga, yhang lé myi jáng, yhang gi, "Ngamoq gi, myo myo nghut

é yanmai, Legio gâ lhê." ga tâ taî ri. ¹⁰ Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dû but zô nyi bum akô nghut ri. ¹² Haú mù luí, nat gânq pé gi, "Ngamoq lé, waq pê chyáng nhang kat luí, yhangmoq chyáng wàng nhâng laq." ga luí, Yesuq lé dung akô. ¹³ Haú hkûn, Yesuq gi, yhangmoq lé ahkáng byî kat jáng, haú agè ashop é nat pé gi, haú yuq chyáng mai htoq ló kôluí, waq pê chyáng wang ló byuq bekô nghut ri. Haú mù, haú í hkyíng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

¹⁴ Waq zúng bang gi, hpang din wang ló kômù, myuq hkaú mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, ê htoq wú akô nghut ri. ¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to lánq é lé myàng kômù, gyuq dan bùm bekô nghut ri. ¹⁶ Haú hkyô lé myang é bang gi, nat gânq pé wang júng sù eq waq pê chyáng hkâsu dut é hkyô, góbang lé taî kyo akô nghut ri. ¹⁷ Hau htâng, byu pé gi, Yesuq lé yhangmoq é mau mai htoq ló byuq râ matú, chòm dúng tôngbán akô nghut ri.

¹⁸ Yesuq lhai hkaú má wang ló é u lé, haú nat gânq pé wang júng lai lò bê sù gi, Yesuq htâng cháng râ matú, Yesuq lé dung tôngbán ri. ¹⁹ Nghut kôlhang, Yesuq gi, yhang lé ahkáng a byi e za, "Nàng, yhûm shut sheq ló mù, haú Yhumsîng, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, nánq é yhumbyù buinùm ji-myi wui lé ló taî kyo aq." ga tâ kat ri. ²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé,

Dekapoli* mau bang lé ló tâi kyô ri. Haú hkûn, wó gyô é bang banshoq gi, mauhong bum akô nghut ri.

*Shi Byuq Bê Myiwe Zo Eq No É Myiwe Myhi Rayuq É Hkyô
Mht 9:18-26; Luk 8:40-56*

²¹ Yesuq gi, lhaî ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhinghkyuq má lé zîng bum akô nghut ri; ²² haú hkûn, Ya-iruoq gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyî wang má paî gop to mù, ²³ "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nàng lé mù, yhâng é ahtoq má loq lé ke byi laq." ga, wum kat dîng tôngbán nyi ri. ²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

²⁵ Haú hkûn, raxe í zân suí yui nyi é myiwe myhí rayuq le haú hpúng má bo tô ri. ²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lhang wuîhke lò ri. ²⁷ Yhang gi, Yesuq é hkyô lé wó gyo jáng, byù hpûng mai Yesuq é nunghtáng má huí lé mù, Yhâng é bu má ê záng kat ri. ²⁸ Haî mù luí gâ le, yhang gi, "Ngò, Yhang é bu má za lhang ê wó záng é nghut le gi, ge byuq râ nghut lhê." ga wó myit é yanmai, haú su kut é nghut ri. ²⁹ Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lú?" ga myi kat ri.

* 5:20 Dekapoli gâ é gi, Grik đông myuq raxê lé gâ lhê.

³¹ Haú hkûn, Yhâng é chángzô pé gi, "Náng é lhîngkyuq má byù ajùm ayò chýn chyap nyi é lé, myang to luí nhîng, 'Ngo lé, ó yuq záng bê lúhú?' nghû myi lîê lúhú?" ga tâi kat akô.

³² Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashî nghut ri. ³³ Haú hkûn, myiwe myhí haú gi, yhâng chyáng hkâsu dut lâi lò bê hkyô lé sê é yanmai, Yesuq é hí má lé mù, gyuq nán é èq Yhang é hkyî wang má ngóm gop to luí, yhâng chyáng dut lâi lò bê hkyô banshoq lé tâi kyô ri. ³⁴ Haú mù, Yesuq gi, myiwe myhí haú lé, "Byizo ê, náng é lumjîng myit gi, nàng lé lhoq gê byi bê nghut ri; náng é nõhpyo ge byuq bê nghut ri; ngón za ló aq hko!" ga tâi ri.

³⁵ Yesuq gi, dang ru tâi nyi ashî hkûn, tarajong má up sù Ya-iruiq é yhûm mai byù ra-am jé lé mù, "Nang é byizo gi, shi byuq bê; haî mù luí, haú sará lé lhoq hkyik nyi lîê lúhú?" ga luí, lé tâi kat akô.

³⁶ Yesuq gi, haú bang tâi é dang lé gyô lhaî pyám mù, "Hkâgyuq, za lumjîng aq." ga, haú tarajong má up sù lé tâi kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri. ³⁸ Yhangmoq, haú tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúmhaú shut wang ló mù, haú bang lé, "Haî mù, yón ngau gabyông nyi bum akô lúhú? Haú zoshâng gi, shi byuq é a nghut, yhup myhî tô é sheq ru nghut lîê." ga tâi ri. ⁴⁰ Nghut kôlhang, yhangmoq gi, Yhang lé wuizui kut pyám byî akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lîeq tô é gok má wang

e akô nghut ri. ⁴¹ Yesuq gi, miywe zo hau é loq má zûi to mù, "Talihta ku-mi" (haú é lichyúm gi, "Miywe zo ê, ngò, nang lé tái bá, toq aq." gâ é nghut lhê.) ga tái ri. ⁴² Miywe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yhangmoq lé tái hkúm kat luí, miywe zo haú lé, zô jung byi tso râ matú le, yhangmoq lé tái ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri. ² Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lháng kut lhê laq? ³ Shí yuq gi, Mariq é yhangzo, laksîma hpó nghut lhê, a nghut lhuí? Yhang gi, Yakuq, Yose, Yudaq, Simun pê é yhangmang nghut lhê, a nghut lhuí? Yhâng nhammó pé le, nga-nhúng eq rahá nghut nyi lhê, a nghut kó lhuí?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé tái é gi, "Myiqhtoi rayuq gi, yhumsing é yhum mau, yhâng é buinùm ji-myi wuè eq yhumsing é yhùm má za, myoqdong a lhaq wó wú é nghut lhê." gâ ri. ⁵ Yhang gi, nò byù ra-am lé loq ke byi mù, lhoq gê byí é mai lai luí, gotû laklaí kumlhá hái le, haú má a wó kut shit nghut ri. ⁶ Haú mù, Yesuq gi, yhangmoq lumjúng myit a bò kô é hkyô lé, maú nyi ri. Hau htâng, Yhang gi,

Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haû lagyo raxe í yuq lé wut yù mù, agè ashop é nat pé lé ûng râ a-tsam byi luî, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai luî, zoshuq le, etap le, ngùn le, gotû haî le, hkâyû chûng kó; ⁹ hkyî-tsung kúm gi, tsûng chûng keq; nghut kôlhang, bu í dung hkâwut chûng kó. ¹⁰ Hká má nghut kôlhang, rayhûm yhûm má nungmoq wang bing kô é nghut le gi, haú wâ mai dum htoq ló é buinyì jé shoq, haú yhûm má za nyi nyì keq.

¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

¹² Haû mù, yhangmoq gi, htoq e ló luî, myit lêng râ é hkyô, byu pé lé hkô kyô akô. ¹³ Hau htoq agó, yhangmoq gi, nat gâng pé myo myo lé hkat htoq pyâm byi mù, no é bang myo myo lé le xû but byi luî, lhoq ge byî akô nghut ri.

Yohan, Ulhum Hpyit Huî é Hkyô

Mht 4:1-12; Luk 9:7-9

¹⁴ Yesuq é mying hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haû shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luî, taî bum akô nghut ri.

¹⁵ Ra-am gi, "Yhang gi, Eliyaq nghut ri." ga taî akô nghut ri.

Dum, ra-am taî kô é gi, "Yhang gi, hí hpyang lhê é myiqhtoî pé su, myiqhtoi rayuq nghut ri." gâ ri.

¹⁶ Herut kúm gi, haú lé wó gyo jáng, "Ngò, ulhum hpyit pyám byî é Yohan gi, shi é mai dum dui toq bu-nhung!" ga taî ri.

¹⁷ Herut gi, yhanggu Hpilip é yhangmyi Herudiaq lé hâng yu pyám é hkyô é yanmai, Yohan lé chyup tuî yù nhâng mù, htóng hkyô pyám nhang wú é sù nghut lhê.

¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luî, taî byî nyi é yanmai nghut ri. ¹⁹ Haú mù, Herudiaq gi, Yohan lé gyai a jú dut byuq luî, sat pyám naû kôlhâng, a wó sat dut nyi ri. ²⁰ Haî mù gâ le, Herut gi, Yohan, dingmán chyoyúng é sù nghut é lé sé mù luî, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhâng, yhang taî é dang pé lé ru gyô nau nyi ashî nghut ri.

²¹ Nghut kôlhâng, Herut gi, yhâng é hkû ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poî mó kut é yanmai, haú nyí gi, Herudiaq é matú, buinyì gè dut bê nghut ri. ²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haî nghut kôle, dung aq, ngò nàng lé byi râ nghut lhê." ga, dakam é danggidiq byî ri. ²³ Hau htoq agó, yhang gi, myiwe zo haú lé, "Nàng dung é haî nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byî ri.

²⁴ Haú hkûn, myiwe zo haú gi, htoq ló mù, yhâng nu lé, "Haí dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taí kat ri.

²⁵ Myiwe zo haú gi, radá dâm hân hân wang ló mù, hkohkâm lé, "Ahkuî yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haú su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, myiwe zo haú taí é dang lé a kâm he pyám lo nghut ri. ²⁷ Haú mù, hkohkâm gi, zúng é gyezo rayuq lé, Yohan é ulhum ê hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má ê luí, Yohan é ulhum lé, ê hpyit mù, ²⁸ bó má kat luí, myiwe zo haú lé lo byi ri; myiwe zo haú gi, ulhum haú lé, yhângnú chyáng yu ló byi ri. ²⁹ Yohan é chángzô pé gi, haú hkyô lé wó gyo kôjáng, yhâng é mâng lé lé yû luí, lup má ló myhup pyám bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zîng lò kômù, yhangmoq kut lâi lo é hkyô pé eq mhoqshit bê hkyô pé banshoq, Yhang lé taí kyô akô nghut ri. ³¹ Hau htâng, byù myo myo gi, yhangmoq chyáng htoq htoq wàng wàng kut nyî kô é yanmai, yhangmoq gi, zang zo ahkyíng lháng a wó kó nghut ri. Haú mù, Yesuq gi, chángzô pé lé, "Nga-nhúng, tsím tsâm é jowò ralhú má ê mù, ê nô yù sháng." ga taí ri.

³² Haú mù, yhangmoq gi, yhangmoq baú lhaî racham má ji mù, tsím tsâm é jowò shut e ló akô nghut ri. ³³ Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, và hkangmó mai hkyí

hkyô châng din ê kômù, yhangmoq é hí má jé to lánq akô nghut ri. ³⁴ Yesuq gi, lhaí mai gyó dap ló é hkûn, byù moq mó nyi to lánq lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luî, myo myo mhoqshit byî hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê; ³⁶ yhangmoq gi, awui ayàm mâ é yhûm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga taí akô nghut ri.

³⁷ Haú hkûn, Yhang gi, "Nungmoq, yhangmoq lé rajung jung byi tso keq." ga tû taí jáng, yhangmoq gi, "Shî myhô é bang zo râ matú, ngamoq gi, ê luî, denari* í sho eq muk ê wuí byi ra râ luq?" ga dum taú myî akô nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myî ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taí akô nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhâng é chángzô pé lé taí kat ri. ⁴⁰ Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri. ⁴¹ Yesuq gi, haú muk ngo long eq ngozo í du lé yù mù, mauhkúng shut tu wú to luî, jeju ban hkya-on jáng, muk lé hpê gam ri. Hau htâng, Yhang gi, byu pê hí má châng hkat to byi râ matú, Yhâng é chángzô pé lé byî ri. Ngozo í du lé le, Yhang yù mù, banshoq bang lé gàm byî ri. ⁴² Yhangmoq banshoq bang gi, zô gyî bùm bekô nghut ri. ⁴³ Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashî kó

* 6:37 Denari rachap gi, byù rayuq é ra-nyí lhê é zuihpau eq wuí ri.

nghut ri. ⁴⁴ Haú hkûn, zô é bang gi, yuqgè wuì baú lhang, byù du ngo hkyîng nghut ri.

Yesuq, Wuì Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haú shiwa byu pé lé byo ló nhang nyi é hkûn jáng, Yhâng é chángzô pé lé lhaî má wang ji nhâng mù, tû tap mâ é Bet-saida wà mó shut dap ló lhang nhang ri.

⁴⁶ Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhaî gi, nhông gùng má jé tô é u lé, Yesuq gi, Yhang baú za myì htoq má nyi tô ashî nghut ri.

⁴⁸ Lài tau mut é yanmai, haú chángzô pé gi, lhaî lhu wúîhkê nyì kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luî, yhangmoq é nàm mai lái ló râ dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluî, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyì keq." gâ ri. ⁵¹ Hau htâng, Yhang gi, lhaî htoq má yhangmoq eq rahá ê doq ji jáng, lai gi, zîm byuq bê nghut ri; haú mù, yhangmoq gi, gyai yhang mauhong byuq bùm bekô nghut ri. ⁵² Hkâsu mù gâ lé, yhangmoq gi, muk gam é laklaí kumlhá eq séng luî a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhaî lé haú má ló shap tô akô nghut ri.

⁵⁴ Yhangmoq lhaî mai gyó é hkûn jáng, byu pé gi, Yesuq lé lhom wú sê akô nghut ri. ⁵⁵ Haú mù, yhangmoq gi, haú

mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkanmó má, shuí lé lo bum akò nghut ri. ⁵⁶ Yesuq jé é wà hkanmó, myuq hkanmó, awui ayàm má é wà hkanmó pé má, yhangmoq gi, nò byù lé gai pé má lé lheq to kôluí, Yhâng é bushi htâng má za lháng, haú bang lé byi záng nhâng râ matú, Yhang lé dúng tôngbán akò. Yhang lé záng é lhunglhâng bang gi, lhoq gè byí é huí akò nghut ri.

7

*A Sanséng Dut Nhang É Hkyô Pé**Mht 15:1-20*

¹ Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zing bum akò. ² Haú hkûn, Yhâng é chángzô pé ra-am gi, htungli dông a chí pyâm é, a sanséng é loq èq zo shuq nyí kô é lé, yhangmoq myang akò nghut ri. ³ (Hparishe pé eq Yudaq byù banshoq bang gi, yhangmoq é îchyí îwâ pê é htungli lé châng é bang nghut lhê mù luí, loq hí a chí é gi, haí le a zô wú kó nghut ri. ⁴ Yhangmoq gi, gai pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htungli gotú pé lé le, châng akò nghut ri.)

⁵ Haú mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, îchyí îwa pê é htungli lé a châng e za, a sanséng é loq èq zo shuq nyi akò lú?" ga myí akò.

⁶ Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoi Esai-aq htoí tô é dang má,

'Byù shí bang gi, nhut htoq mai za Ngo lé hkunggâ akò; yhangmoq é myit nhiklhum gi, Ngò eq wê gâng nyi akò.

⁷ Yhangmoq gi, akôm má za, Ngo lé noqkuq nyi akô; hkâsu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.[✠] ga kê tô é gi, têng ri. ⁸ Nungmoq gi, Garai Gasang tô tô é hkunmó lé tô pyám luí, byu é htungli lé za, myhik zing tô akô nghut ri." ga luí tũ taí ri.

⁹ Hau htâng, Yhang xoq taí é gi, "Nungmoq gi, yhumsing é htungli lé za cháng rã matú, Garai Gasâng é hkunmó lé he-ngik pyâm é má, hpaqchyí gyaí bo akô nghut ri. ¹⁰ Hkâsu mù gà le, Mosheq gi, 'Nungmoq é înu îwa lé, hkungga keq.[✠] ga le, 'Înu îwa lé, nhîng é sũ ó yuq nghut kôle, sat pyâm é hui rã lhê.[✠] ga le, kê tô é nghut lhê. ¹¹ Nghut kôlhâng, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi rã chyunghuq) nghut lhê gá nhang akô. ¹² Haú mù, haú yuq lé, yhângnu yhângwã é matú, haí a kut byi nhâng lô é dông dut bê nghut ri. ¹³ Haú dông mai, nungmoq gi, nungmoq chung gyó lo é htungli é yanmai, Garai Gasâng é mungdang lé he-ngik pyâm akô; haú sũ é hkyô myo myo lé le, nungmoq kut akô nghut ri." gà ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq; ¹⁵ Shinggan mai wang lo é haí jung le, byù lé a sanséng dut nhang é a nghut, nghut kôlhâng, byu é unghkaú mai htoq ló é zè kúm gi, byù lé a sanséng dut nhang lhê." gà ri. ¹⁶ (Gyo rã nohkyap dap é sũ gi, gyô yù sháng gaq.)" ga taí ri.*

¹⁷ Yhang gi, byù moq mó mai htoq ló mù, yhúmhaú má jé wang ló é hkûn, Yhâng é chángzô pé gi, dangtú haú eq séng luí, Yhang lé lhom myí akô nghut ri. ¹⁸ Haú mù,

✠ 7:7 Esai 29:13 ✠ 7:10 Htoq Ló 20:12 ✠ 7:10 Htoq Ló 21:17 * 7:16
Bun zo shí gi, Chyúmlaika ra-am má bo lhê, ra-am má a bò.

Yhang gi, yhangmoq lé, "Nungmoq gi, haû-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lú? ¹⁹ Hkâsu mù gâ lé, haû gi, byu é myit nhiklhum hkaû má wang ló é a nghut e za, wamdau hkaû má sheq wang ló é nghut mù, shinggan shut dum lhoq htoq pyâm é nghut lhê." ga taî ri. (Yhang isu ga taî é gi, zoshuq lhunglhang sansêng lhê gâ nau é đông nghut ri.)

²⁰ Hau htoq agó, Yhang xoq taî é gi, "Byù mai htoq ló é haí jung le, byù lé a sanséng nhâng wó dut é nghut lhê. ²¹ Hkâsu mù gâ lé, ahkaû mai htoq lo é gi, byu pè é myit mai htoq ló é nghut mù, agè ashop é đông myit é hkyô pé, ashop é đông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô, ²² myoqnoq é hkyô, agè ashop é hkyô, mhaú zô é hkyô, achay achyut zùm yap lhûm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³ Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gâ ri.

Tûngbàu Myiwe Myhí Rayuq É Lumjínq Myit

Mht 15:21-28

²⁴ Yesuq gi, haû jowò mai htoq ló mù, Turuq eq Sidun maukyo shut e ló luî, yhûm ralhûm má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵ Haû mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyî wang má lé paî gop to luî, ²⁶ yhang zô chyáng mai nat gang lé hkat htoq pyâm byi râ matú, Yhang lé dúng tôngbán ri. Myiwe haû gi, Suru-Hpiniki mau mâ é Grik byuhú nghut ri.

²⁷ Yesuq gi, "Zo wuî† hí zô gyi kó sháng gaq; haî mù gâ le, zô wui chyáng mâ é zoshuq lé yù mù, hkuî pé‡ lé byi tsô é jung a nghut." ga yhang lé taî kyô ri.

²⁸ Haú hkûn, yhang gi, "Yhumsîng ê! Haú kúm nghut ri; nghut kôlhang, siboî ô mâ é hkui lháng, zô wui é zô myhit shuq htâng lé, ge zo lhê a nghut lú?" ga dum tû taî ri.

²⁹ Haú mù, Yesuq gi, yhang lé, "Nàng tû taî é dang hau é yanmai, ló lo aq hkoi; haú nat gang gi, nung zô chyáng mai htoq ló byuq bê nghut ri." ga taî kat ri.

³⁰ Myiwe myhí haú gi, yhûm má dum taû jé lo é hkûn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sû Lé Lhoq Gê Byî É Hkyô

³¹ Yesuq gi, Turuq mau mai dum htoq ló mù, Sidun mai sô laî ló luî, Dekapoli mau hkaû dông laî byit mù, Galile nhông shut gyó jé ló ri. ³² Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.

³³ Yesuq gi, haú yuq lé baú za byù hpúng mai shuí htoq yû mù, yhâng é nohkyûng má loqnyhui htaû háng byi luî, sôkan byé tik yû mù, haú yuq é shô má htau byî ri. ³⁴ Hau htâng, Yhang gi, mauhkûng shut tu wú mù, soq mó shê luî, "Ehpahta!" (Lichyúm gi, "Bóng aq hkoi!") ga luî, haú yuq lé taî kat ri. ³⁵ Haú hkûn, haú yuq é nohkyap le bóng byuq luî, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haú hkyô ó lé le a taî kyo râ matú, yhangmoq lé hkúm kôlhang, yhangmoq gi, je hkúm le, je taî pyo akô nghut ri. ³⁷ Byu pé gi, gyai yhang mauhong byuq bùm

† 7:27 Zo wuî gâ é gi, Yudaq byu pé lé gâ é nghut lhê. ‡ 7:27 Hkuî pé gâ é gi, tûngbaù pé lé gâ é nghut lhê.

kôluî, "Yhang gi, haî lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luî, taî bum akô nghut ri.

8

Byù Myi Hkyîng Lé Byi Tsô É Hkyô

Mht 15:32-39

¹ Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. ³ Yhangmoq chyáng mâ é ram gi, mau we mai lé é bang nghut é yanmai, yhangmoq lé, zòmút gû yhûm shut nhang kat é nghut le gi, hkyolat má mutyut yut é ló hui kó râ nghut lhê." ga taî ri.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shî myhô bang lé luq shoq byi tso râ zoshuq gi, hkâmá ê yû râ lhú?" ga taî akô.

⁵ Yesuq gi, "Nungmoq, muk hkâ-myhó long wó akô lhú?" ga taû myi jáng, yhangmoq gi, "Nyhit long." ga, dum tû taî akô nghut ri.

⁶ Haû mù, Yhang gi, byù hpûng lé myigùng htoq má zùng nhang to luî, muk haû nyhit long lé yù mù, jeju ban hkya-on jáng, myhik hpé luî, haú bang lé gàm byi râ matú, Yhâng é chángzô pé lé byî kat ri; haû mù, yhangmoq gi, haú bang lé gàm byî akô nghut ri. ⁷ Yhangmoq gi, ngo-nú zo ratsuí le wó akô nghut ri; haû mù, Yhang gi, ngozo haú pê é matú jeju hkya-on luî, chángzô pé lé dum gàm byî nhang ri. ⁸ Yuq hkangmó zô gyî bùm kô é htâng má, haû chángzô pé gi, amyit ahtâng lé nyhit mung byíng shoq wó guq tsîng yu ashî kó nghut ri. ⁹ Zô é bang gi, byù myi hkyîng kô nghut ri; Yesuq gi, haú bang lé, nhang kat

luî, ¹⁰ Yhâng é chángzô pé eq rahá, lhaî má wang ji mù, Dalamanuhta mau má ê jé akô nghut ri.

¹¹ Hparishe pé gi, lé mù, Yesuq eq dang htíng htíng lhûm akô; hau htoq agó, yhangmoq gi, mauhkûng mâ é kumlhá lé dûng é dông, Yhang lé chyam wú akô nghut ri.

¹² Yesuq gi, myit nò-kying kying luî, yhangmoq lé taî é gi, "Haî mù luî, shí ipyat lhê é byu pé gi, limik kumlhá dûng akô lhú? Ngò teng za taí kôlé, shí ipyat mâ é bang lé, hai kumlhá le tûn shit râ a nghut." gâ ri. ¹³ Hau htâng, Yhang gi, yhangmoq lé pyâm to mù, lhaî má dum taû wang ló luî, tû tap shut gû dap e ló bê nghut ri.

Hparishe Pé Eq Herut É Múnchi

Mht 16:5-12

¹⁴ Haû chángzô pé gi, muk yu chûng râ lé tô-myhî pyám kôluî, lhaî hkaû má muk ralong za ru wó akô nghut ri.

¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luî, koi pyâm nyi keq." ga taî ri.

¹⁶ Haû hkûn, yhangmoq gi, "Nga-nhûng chyáng muk a bo é yanmai, haû su ga taî é nghut ri." ga luî, rayuq eq rayuq taî lhûm bum akô nghut ri.

¹⁷ Haû su ga taî lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haî mù taî lhûm nyi akô lhú? Ahkuî jé shoq, nungmoq gi, a byu-myàng, a sê gyo shi kó lhú? Nungmoq é myit nhiklhûm gi, ru htan nyi ashî kó lhú? ¹⁸ Myoq dap to kôluî nhîng, a myàng kó lhú? Nohkyap dap to kôluî nhîng, a wó gyo kó lhú? ¹⁹ Ngò, muk ngo long lé myhik hpé mù, byû ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsîng yu é lé, bun ashî kó lhú?" ga myi jáng, yhangmoq gi, "Raxe í mung." ga tû taî akô.

* 8:15 Shî má taî é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyíng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsíng yù kô é l hú?" ga myi jáng, yhangmoq gi, "Nyhit mung." ga dum tû taí akô.

²¹ Haú hkûn, Yesuq gi, "Haú nghut le nhîng, ahkuî le, a sê gyo shi kó l hú?" ga, yhangmoq lé myî ri.

Myoqjit Sû Rayuq Lé Lhoq Gê Byî É Hkyô

²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dîng tôngbán akô. ²³ Yesuq gi, myoqjit sû haú yuq é loq lé zui mù, wà shinggan shut shuí htoq ló luî, yhâng é myoq má sôkan byé tik byi mù, loq ke byi luî, "Nàng, rajung jung lé myang ri l hú?" ga myî kat ri.

²⁴ Haú jáng, yhang gi, tu wú kat luî, "Byu pé gi, sîkgâm su dut luî, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byî ri; haú hkûn, haú yuq é myoq gi, bóng lô mù, ge byuq luî, haî lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga taí luî, yhâng é yhûm shut ló nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayàm mâ é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô l hú?" ga myî ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tû taí akô.

²⁹ Yesuq gi, "Nungmoq gi, ngo lé ó yuq nghut lhê ngu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tâ tái ri.

³⁰ Yesuq gi, haú hkyô ó lé le a tâi kyo râ matú, yhangmoq lé tâi hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo luí, suwún wuî, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyì má, dum dui toq râ nghut lhê." gâ ri. ³² Yesuq gi, haú hkyô lé san za dut shoq tâi nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, tâi é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chùng luí, cháng ra râ nghut lhê. ³⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é

† 8:29 Grik dong Hkrisduq gâ é gi, xú but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

matú, hai akyû bò râ l hú? ³⁷ Byù gi, yhum-sing é asak woi-nyí lé, hai èq wó htaî yù râ l hú? ³⁸ Yubak mara myô é eq su-myi sulàng shut é ipyat shî má, Ngò eq Ngá é dang lé hoq pyâm é sù ó yuq lé le, haû Byu Yhangzo gi, Yhâng Wâ é hpungwup shing-kang bo é èq, haû chyoiyúng maumang lagyô pé eq rahá jé lé é hkûn, hoq pyám râ nghut lhê. "☆ gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shî kó râ a nghut." ga taî ri.

Yesuq É Ihpyô Isâm Htaî Lo É Hkyô

Mht 17:1-13; Luk 9:28-36

² Hkyuq nyí laî htâng má, Yesuq gi, Petruq lé le, Yakuq eq Yohan lé le, shuî chûng mù, yhangmoq baú myhang é bùm ralhum má doq lô akô; haû hkûn, yhangmoq é myoq hí tê má, Yesuq é ihpyô isâm htaî lo ri. ³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haû-í hpyû shoq a wó xaû hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dáng nyo lhûm nyi akô.

⁵ Haû mù, Petruq gi, Yesuq lé, "Rabai ê, shí jowò má ngan-húng nyi le ge ri; haû mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taî ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haî taí râ le a sé mù, haû su gâ é nghut ri.

⁷ Hau htâng, mhut htoq lô luí, yhangmoq lé htup zíng lô mù, mhut hkaû mai htoq lo é htê gi, "Shí yuq gi, Ngò

☆ 8:38 Yer 3:8; Ezk 23:37; Hos 2:2-10

chyitdap é Ngá Zo nghut lhê; Yhâng é dang gyo keq." gâ ri.

⁸ Haú hkûn jáng, chángzô pé gi, lînghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taû gyó lô kô é hkûn, Yesuq gi, haû Byu Yhangzo shi é mai a dum dui toq toq gi, yhangmoq myang é hkyô lé, ó lé le a taî kyo râ matú taî hkûm tô ri. ¹⁰ Chángzô pé gi, dang haú lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myî lhûm bum akô nghut ri.

¹¹ Hau htâng, yhangmoq gi, "Eliyaq hí lé ra râ nghut lhê ga, tarâ sará pé haî mù taî kô é lú?" ga, Yesuq lé myî akô.

¹² Haú hkûn, Yesuq gi, "Eliyaq hí jé lé é gi, teng bê nghut luí, lhunglhang lé dum lajâng tô é nghut ri. Nghut kôlhang, haû Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashî, a nghut kó lú?" ¹³ Ngò, nungmoq lé taî kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taî ri.

Nat Dap É Yuqgè Zo Rayuq Lé Lhoq Gê Byî É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pê chyáng dum taû jé lô kô é hkûn, haú bâng é lînghkyuq má byù moq mó zîng lé é lé le, tarâ sará pé, haú bang eq dang htíng htíng lhûm nyi kô é lé le, myang akô. ¹⁵ Haú má nyi tô é lhunglhang bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

¹⁶ Haú hkûn, Yesuq gi, yhangmoq lé, "Nungmoq gi, yhangmoq eq haî lé dang htíng htíng lhûm nyi akô lú?" ga myî ri.

¹⁷ Byù hpúng hkaû mâ é rayuq tâ tâi kat é gi, "Sarâ ê! Nhut jit nhang é nat wang júng tô é ngâ é yuqzo lé, Náng chyáng shuî lé lo lhê. ¹⁸ Nat haû gi, yhâng chyáng wàng hkangmó, yhang lé myì htoq má lhoq leqbat nhang ri; haû mù, yhang gi, nhut mai guttsû htoq lhê, zuì kyik kyik lhê, langhtan lo lhê, dut ri; hau é yanmai, nat haû lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

¹⁹ Haû hkûn, Yesuq gi, "Lumjúng myit a bo é amyû pé ê, Ngò gi, hkâ-myháng jé shoq nungmoq eq rahá nyì mù, wó jân nyì râ lhu? Yuqgè zo haû lé, Ngá chyáng shuî lé lô keq." ga tâi kat ri.

²⁰ Haû mù, yhangmoq gi, yuqgè zo haû lé shuî lé lo akô; nat haû gi, Yesuq lé myang kat é eq yhang, yuqgè zo haû lé langhtân nhang ri; yuqgè zo haû gi, myigùng má lêng leq luî goleng leng mù, nhut mai tsû-myup htoq nyi ri.

²¹ Haû hkûn, Yesuq gi, yhângwa lé, "Yhang, isu dut é hkâ-myháng myáng bê lhu?" ga myi jáng, yhâng wa gi, "Zoshâng hkûn mai nghut bê. ²² Nat haû gi, yhang lé lhoq sat pyám naû mù, myi má le, wuì má le, anum num lêng wàng nhang wú bê nghut lhê; nghut kôlhang, Nàng, rajung jung wó kut byî é nghut le gi, ngá hpe lé shogyo yù laq, garúm yû laq." ga tâi ri.

²³ Yesuq gi, "Nàng, wó kut byî é nghut le gi, ' nghû, haî mù tâi lhê lhu? Lumjúng myit bò su é matú gi, haî le wó dut lhê." ga, yhang lé tâi ri.

²⁴ Haû zôshang é yhângwa gi, radá dâm, "Ngò lumjúng lhê; nghut kôlhang, ngá é lumjúng myit gi, shaû ashî nghut é yanmai garúm yû laq." ga tâi garû ri.

²⁵ Yesuq gi, byù hpúng din zîng lé lô kô é lé, myàngjáng, haû agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq ló aq;

hkâ-nhám le, yhâng chyáng hkâdum wàng lo." ga tân kat ri.

²⁶ Haú hkûn, nat haú gi, garu mù, zoshâng haú lé wum kat langhtân nhâng luí, htoq ló byuq bê. Zoshâng haú gi, shí màng gùng su dut byuq é yanmai, byù myo myo gi, "Yhang shí bê nghut ri." ga tái akô. ²⁷ Nghut kôlhang, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmhkaú má wang ló é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lú?" ga, tsik za Yhang lé myí akô.

²⁹ Yesuq gi, "Haú jung nat lé gi, kyûdûng é đông za a nghut jáng, wó hkat htoq râ a nghut." ga, yhangmoq lé tû tái ri.

³⁰ Yhangmoq gi, haú jowò mai htoq ló mù, Galile mau mai lai ló akô; nghut kôlhang, Yesuq gi, ó lé le a sé nhâng naù nghut ri. ³¹ Haí mù gâ le, Yhang gi, "Haú Byu Yhangzo gi, byu pê é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byí nyi é yanmai nghut ri. ³² Yhâng é chángzô pé gi, dang haú lé a sê gyo kôlhang, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lú?

Mht 18:1-5; Luk 9:46-48

³³ Yhangmoq gi, Kaperna-um wà má jé e akô nghut ri. Yesuq gi, yhúmhkaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chýn lhum kô é lú?" ga myí ri. ³⁴ Nghut kôlhang, yhangmoq gi, zim za nyi tô akô; hkâsu mù gâ le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chýn lhum kô é yanmai nghut ri.

³⁵ Yesuq gi, zùng mù, haû chángzo raxe í yuq lé, wut yù luí, "Kô dik naû sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taí ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gûng má shap to luí, dum bún yù mù, yhangmoq lé taí é gi, ³⁷ "Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

Nga-nhúng Lé Gyè A Kut É Sù Gi, Nga-nhông É Hkyam Shut Nghut Lhê Gâ É Hkyô

Luk 9:49-50

³⁸ Haú hkûn, Yohan gi, "Sarâ ê! Náng é myìng lang luí, nat gâng pé lé hkat pyâm byí wún é byú rayuq lé, ngamoq myang ri. Yhang gi, nga-nhông chyáng a lòm sù nghut é yanmai, yhang lé ngamoq hkûm pyâm é nghut lhê." ga taí ri.

³⁹ Yesuq kúm gi, "Yhang lé hkâhkúm kó; Ngá myìng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhông é hkyam shut nghut lhê. ⁴¹ Ngò, nungmoq lé teng za taí kôlé, nungmoq gi, Hkrisduq eq séng é bang nghut lhê gâ é yanmai, ngá é myìng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjìng é zoshâng wuì mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyó pyâm é huí é

nghut lé gi, yhang é matú je gè râ nghut lhê. ⁴³ Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduoq a dat shum é ngaraî ming wàng râ htoq má, loq raloq eq za ahtum abyuoq é asak wó râ shut wàng le gi, náng é matú je ge ri. ⁴⁴ (Haú ngaraî ming gi, 'yhangmoq lé hkê nyi é luq le a shî, myiduoq le a shûm' é jowò nghut lhê.)* ⁴⁵ Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyî í hkyî dap luí, hkâ-nhám le, myiduoq a dat shum é ngaraî ming má dú hkyô pyâm é hui râ htoq má, hkyî rahkyî za dap luí, ahtum abyuoq é asak wó râ shut wang le gi, náng é matú je ge ri. ⁴⁶ (Haú ngaraî ming gi, 'yhangmoq lé hkê nyi é luq le a shî, myiduoq le a shûm' é jowò nghut lhê.) ⁴⁷ Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gû, ngaraî ming má dú hkyô pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Haú ngaraî ming gi, 'yhangmoq lé hkê nyi é luq le a shî, myiduoq lé a shûm' é jowò nghut lhê.)[☆]

⁴⁹ Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng râ nghut lhê.[☆]

⁵⁰ Xo gi, ge lhê. Nghut kôlhang, xomân kân byuoq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuoq eq rayuoq nguingón nyî keq." ga taí ri.

10

Myi, Làng Gâng É Hkyô
Mht 19:1-12; Luk 16:18

* 9:44 Bun zo 44, 46, gi, Chyúmlaiká myo myo má a bo é nghut lhê. ☆ 9:48

Esai 66:24 ☆ 9:49 Nhung 2:13

¹ Hau htâng má, Yesuq gi, Kaperna-um mai htoq ló mù, Yuda mau mà é maukyo má ê jé luí, Yodan làng tũ tap má dap ló bê nghut ri; byù myo myo gi, Yhâng chyáng dum zing lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byî ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lhu?" ga myî é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyô tô é lhu?" ga taú myî ri.

⁴ Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byî tô ri." ga tũ taí akô.

⁵ Yesuq dum tũ taí é gi, "Nungmoq é myit nhiklhum htân kô é yanmai, Mosheq gi, tarâ haú lé kâ tô é nghut lhê. ⁶ Nghut kôlhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.[✠] ⁷ 'Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhum za kut nyî mù, ⁸ yhangnhik gi, gungsho ralhum za dut byuq kó râ nghut lhê.'[✠] Haú mù luí, yhangnhik gi, í yuq a nghut lo é za, rayuq za dut bê nghut ri. ⁹ Haú mù luí, Garai Gasang lhoq tsâm tô é lé, byù gi, a lhoq kang sháng gaq." gâ ri.

¹⁰ Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myî akô.

¹¹ Haú hkûn, Yhang gi, "Yhumsing é yhangmyi lé kâng pyám mù, myiwe gotũ dum hâng yu é sũ ó yuq nghut kôle, su-myi lú é sũ dut bê nghut mù, yhangmyi lé shut é sũ nghut bê. ¹² Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tũ taí ri.

✠ 10:6 Apûn 1:27 ✠ 10:8 Apûn 2:24

Zoshâng Wuì Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuì lé Yesuq záng byi sháng gaq ga, Yesuq chyáng shuì lé lo akô; nghut kôlhang, chángzô pé gi, yhangmoq lé lhom tân hkûm akô nghut ri. ¹⁴ Haû lé Yesuq myàng jáng, Yhang gi, wú nhik-yo naû luí, "Haû zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haû su é bâng é mingdán ru nghut lê. ¹⁵ Ngò, nungmoq lé teng za tái kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut." ga yhangmoq lé tái ri. ¹⁶ Hau htâng, Yesuq gi, zoshâng wuì lé bún yû mù, yhangmoq ahtoq má loq ke luí, shimân byî ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yû râ matú, ngò haî kut ra râ lhú?" ga myî ri.

¹⁸ Haû mù, Yesuq gi, "Haî mù, Ngo lé ge é Sará nghu lê lhú? Garai Gasang mai lai luí, ge é ó yuq le a nyì. ¹⁹ Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq![☆] ga bo tô é lé, nàng sê lê." ga tû tái ri.

²⁰ Haû hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lê." ga tái ri.

²¹ Yesuq gi, haú yuq lé wú tsuq to mù, yhang lé chyitdap luí, tái é gi, "Nàng kut râ rajung râ tô ashî; ló mù, nàng wó miwó lé ûng pyám luí, myùng bang lé byî pyám aq; haû

[☆] 10:19 Htoq Ló 20:12-16

jáng, nàng, mauhkûng htoq má sutzè wó râ nghut lhê; haû mù, Ngá htâng lé cháng aq." gâ ri.

²² Haû yuq gi, dang haû lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

²³ Yesuq gi, lhîngkhyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haû-í yhang wuî ri-nhung!" ga taî ri.

²⁴ Chángzô pé gi, Yhang taî é dâng é yanmai, mauhong bum akô nghut ri. Nghut kôlhâng, Yesuq dum xoq taî é gi, "Zo wuî ê, Garai Gasâng é mingdán má wàng râ matú, haû-í yhang wuî ri-nhung!" ²⁵ Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luî râ nghut lhê." gâ taî ri.

²⁶ Haû hkûn, chángzô pé gi, je riyhang maú byuq kômù, rayuq eq rayuq, "Haû su ru nghut le gi, ó yuq za hkyi yu é hui râ nghut lhê lhú?" ga, taî lhûm bum akô nghut ri.

²⁷ Haû hkûn, Yesuq gi, yhangmoq lé wú kat mù, "Haû hkyô lé, byù mai gi, wó kut râ a nghut; nghut kôlhâng, Garai Gasang gi, wó dut lhê; hkâsu mù gâ le, Garai Gasang gi, lhunglháng lé wó kut é Sù nghut lhê." ga taî ri.

²⁸ Haû hkûn, Petruq gi, Yhang lé, "Ngamoq gi, wó é gû lhunglháng lé tô pyâm to luî, Náng htâng cháng bê nghut lhê." ga taî ri.

²⁹ Haû mù, Yesuq tû taî é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuî eq yò pé lé tô pyâm tô é sù ó yuq nghut kôle, ³⁰ shí pyat lhê é yhûm pé, gumang gu-nhá wuî, înu pé, zo dù wuî eq yò pé lé, rashô tú wó hkam yù luî, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê. ³¹ Nghut kôlhâng, hí nghut nyi é

bang myo myo gi, htâng gyó byuq kó râ nghut mù, htâng gyó nyì bang yuq gi, hí bekô râ nghut lhê." gâ ri.

Yesuq, Yhang Shî Râ Hkyô Lé Dum Taí É Hkyô

Mht 20:17-19; Luk 18:31-34

³² Yhangmoq gi, Yerusalem wà mó shut doq ló nyì kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi, ³³ "Wú keq, nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byî pyâm é hui râ nghut lhê; haú bang gi, Yhang lé, shî râ mara byi luî, tûngbaù pê é loq má ap byî pyám kó râ nghut lhê. ³⁴ Haú bang gi, Yhang lé, wuizui kut pyâm é, sôkan byé gyûn é, nhuq bat é kut yû mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê." gâ ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sará ê, ngá-nhik dúng é gû banshoq, Nàng kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô nau akô lú?" ga myî ri.

³⁷ Yhangnhik gi, "Náng é hpungwup shingkang hkaû má, ngá-nhik tâng lé, Náng é loqyò hkyam má rayuq, loqpaî hkyam má rayuq kut, zùng nhâng laq." ga tû taí akô.

³⁸ Nghut kôlhang, Yesuq gi, "Nungnhik haî dîng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lú? Ngò hkam yù râ baptisma lé, nungnhik wó hkam yù kó râ lú?" ga yhangnhik lé tâ ri.

³⁹ Haû hkûn, yhangnhik gi, "Nga-nhik wó dut lhê." ga tâ taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê. ⁴⁰ Nghut kôlhang, Ngá é loqyò, loqpaî hkyam má zùng râ ahkáng lé gi, Ngò byî jung a nghut. Jowò haû pé gi, hen to byî é hui bâng matú za nghut lhê." ga yhangnhik lé tâ ri.

⁴¹ Haû su gâ é hkyô lé, haû gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsîng yù luî, "Tûngbaù pé lé uphkang é ga bang gi, tûngbaù pé lé up zô nyi kô é hkyô lé le, haû eq rajung za, yhangmoq é ming up suwún wuî le, yhumsing é ahkáng ayá lé chûng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haû su a dut kó sháng gaq, nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut naù sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gâ le, haû Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé tâ ri.

*Myojit Sû Barateme, Myoq Dum Myang É Hkyô
Mht 20:29-34; Luk 18:35-43*

* 10:38 Góm eq baptisma gâ é gi, jamjau hui râ eq shî râ lé, taí nau é nghut lhê.

⁴⁶ Hau htâng, yhangmoq gi, Yeriho wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

⁴⁸ Haû mù, byù myo myo gi, zim za nyì râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

⁴⁹ Haû mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nàng lé ji nyi ri; toq aq." ga myoqjit sù haú lé taí akô. ⁵⁰ Haú hkûn, haú yuq gi, yhâng é buhîng lé hkyut pyám mù, byam chy luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé haí kut byi râ ô nau ri lhú?" ga myi jáng, yhang gi, "Sarâ ê, ngò myoq myàng nau ri." ga tû taí ri.

⁵² Yesuq gi, "Ló aq hkoi, náng é lumjîng myit gi, nàng lé lhoq gê byi bê nghut ri." ga taí kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, ² "Nungnhik, hí mâ é wà má ê keq; wà haú má wang é hkûn jáng, ó le a jî wú shî é logúng zo tuí to lánng é lé, ê myâng kó râ nghut lhê; haú lé hpyi yù mù, Ngá chyáng

she lò keq. ³ Byù rayuq yuq mai, 'Haî mù, haû su kut nyi akô lhu?' ga nungnhik lé lhom myi jáng, 'Shí du lé, haû Yhumsîng râ ri ga, razup má dum taû dé byi râ nghut lhê.' nghû tû taí keq." ga pyîng luî, nhang kat ri.

⁴ Haû nhik gi, e ló mù, hkyô mó yâm mâ é hkumdong nàm má tuî tô é logúng zo radu lé, ê myâng kôluî, haû lé tuí hpyi nyi akô. ⁵ Haû hkûn, haû má yap tô é bang ra-am gi, "Haî mù, logúng tuí hpyi nyi akô lhu?" ga myî akô. ⁶ Haû jáng, yhangnhik gi, Yesuq pying kat é eq rajung za taî kyo kôjáng, yhangmoq gi, she ló râ ahkáng byî kat akô nghut ri. ⁷ Yhangnhik, logúng zo haû lé Yesuq chyáng she jé lo é hkûn, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri. ⁸ Byù myo myo gi, yhangmoq é buhîng pé lé, hkyô má hkyut hkang byî akô; ra-am gi, yò pé má zân yu é mhandíng lé hkang byî akô nghut ri. ⁹ Hí má so bang eq htâng má châng é bang gi,

"Hosana!*

Haû Yhumsîng é myîng mai jé lé lô Sû gi, hkungsô wó nyî sháng gaq ô!

¹⁰ Jé lé lô râ nghut é, nga-nhûng é îwa Dawiq é mingdán gi, hkungsô wó nyî sháng gaq ô!

Htoq tsáng myhâng má hosana nghut sháng gaq ô!"☆

¹¹ Yesuq gi, Yerusalem wà mó má jé mù, noqkuq yhûm má wang ê luî, lhîngkhyuq mâ é jung hkangmó lé wú ri; nghut kôlháng, buí gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

* 11:9 Hebre dang má, hosana gâ é gi, "ahkuî hkyi yù laq" gâ é nghut lhê. Nghut kôlháng, bun zo 9, 10 má gi, hkya-on dang dông chung é nghut lhê.

☆ 11:10 Hkya-on 118:25-26

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyí, yhangmoq, Behtani wà mai htoq ló kô é hkûn, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashí zui lhê laq ga ê jé wú le, ahaq mai lai lui, haî le a myàng nghut ri. Haî mù gâ le, maihpáng-shi zui yâm a nghut é yanmai nghut ri. ¹⁴ Haî mù, Yesuq gi, shigâm haî lé, "Ahkuî mai gi, náng chyáng mâ é ashí, ó yuq le a myàng zo lo kó sháng gaq." ga tai ri. Yhâng é chángzô pé gi, haî su ga tai é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haú mâ é zè ung zè wui kut nyi é bang lé, hkat htoq pyám lui, ngùn htaí zo bâng é siboi pé eq hpûngkyui ung zo bâng é tanghkuq pé lé tu mhuaq pyám byî ri. ¹⁶ Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri. ¹⁷ Yesuq, yhangmoq lé mhôqshit é gi, "Ngá yhûm gi, byù myû lhunghâng bâng é matú, kyû-dung yhûm ga râ nghut lhê." ✧

ga kâ tô é a nghut kó lú? Nghut kôlhang, nungmoq gi, 'damaq hkyûng' kut pyám bekô nghut ri." gâ ri. ✧

¹⁸ Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhang, shiwa byu pé gi, Yhang mhôqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaî mai htoq ló bekô nghut ri.

✧ 11:17 Esai 56:7 ✧ 11:17 Yer 7:11

*Maihpáng Gâm Nyhuî Shi Byuq É Hkyô**Mht 21:20-22*

²⁰ Htang napkyó, yhangmoq sô lâi lô le, maihpáng gâm gi, amyit mai yhang nyhuî kyuq shi byuq é lé myang akô.

²¹ Petruq gi, myit bûn kat luî, "Rabai ê, wú aq! Nàng nhîng pyâm é maihpáng gâm gi, nyhuî shi byuq bê nghut ri." ga luî, Yesuq lé tâi ri.

²² Haú hkûn, Yesuq gi, "Garai Gasang lé lumjîng keq.

²³ Ngò, nungmoq lé teng za taí kôlé, ó yuq nghut kôle, i-myit má úng-âng é hkyô a bo é za, yhumsîng taí é hkyô gi, dut lò râ nghut lhê ga lumjîng kô é nghut le gi, bûm shî lé, 'Htot mù, wuimau má lô gyó wâng aq.' ga tâi le lháng, haú hkyô dut byi râ nghut lhê. ²⁴ Haú mù luî, Ngò, nungmoq lé taí kôlé, nungmoq haí dîng le le wó yû râ nghut lhê nghû lumjîng kô é nghut le gi, wó yû kó râ za nghut lhê. ²⁵ Mauhkûng htoq mâ é nungmoq é Íwa gi, nungmoq é mara lé hkyut pyám byi sháng gaq, nungmoq gi, kyûdîng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhang, nungmoq mai mara a hkyut pyám byî é nghut le gi, mauhkûng htoq mâ é nungmoq é Íwa le, nungmoq é mara lé hkyut pyám byi râ a nghut.)" ga tû tâi ri.†

*Yesuq É Ahko Ahkáng Lé Myî Chyam É Hkyô**Mht 21:23-27; Luk 20:1-8*

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuî gi, Yhâng chyáng lé jé kômù, ²⁸ "Hai ahko ahkâng èq, Nàng, shí pé lé kut nyi lhê lhu? Haú su kut râ ahko ahkáng, Nang lé ó yuq byî é lhu?" ga myî akô.

† 11:26 Bun zo shî gi, Chyúmlaika ra-am má za bo lhê.

²⁹ Haú jáng, Yesuq gi, "Ngò le, nungmoq lé rajung myî wú kôlé, tû taí wú keq; haú hkûn, hai ahko ahkâng èq, Ngò, shí pé kut é hkyô lé taí kyo râ nghut lhê. ³⁰ Yohan byî é baptisma gi, mauhkûng mai lhú? A nghut jáng, byu chyáng mai lhú? Taí wú keq!" ga taú myî kat ri.

³¹ Haú hkûn, yhangmoq chôm hpyê lhum kô é gi, "'Mauhkûng mai nghut lhê' nghû nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut; ³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bûm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ngamoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

12

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lhînghkyyuq kyâm to luî, tsibiyiq wing pyik htoq râ donghkong dû to mù, machya ralhûm saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shi ê yû râ matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlhâng, haú bang gi, haú yuq lé lhom chyup bat luî, loq kôm taú nhang kat akô. ⁴ Haú mù, yhang gi, gotû dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú

yuq lé le, ulhum má lhom bat cheq byi kôluî, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

⁷ Nghut kôlhang, haú bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yû râ nghut lhê.' ga rayuq eq rayuq tái lhûm bum akô. ⁸ Haú mù, yhang lé chyup yû luî, sat pyám mù, hkyâm shinggan shut dú htoq pyâm akô nghut ri.

⁹ Haú jáng, tsibiyiq hkyâm yhumsîng gi, yhangmoq lé hkâsu kut râ lúh? Yhang gi, ê mù, haú hkyâm saí zo bang lé sat pyám luî, hkyâm haú lé, góbang lé htot ngho byi pyám râ nghut lhê. ¹⁰ Chyúmdang má, 'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

¹¹ Shí hkyô gi, haú Yhumsîng kut é nghut luî, nga-nhúng é myoq hí má mauhpo dut bê nghut ri.' ga bò tô é lé, nungmoq a nghap wú kó lúh?"[☆]
gâ ri.

¹² Hau htâng, yhangmoq gi, dangtú haú, yhangmoq lé lhoq ang luî tái é hkyô lé, sé kô é yanmai, Yhang lé chyup yû râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luî, htoq ló byuq bekô nghut ri.

[☆] 12:11 Hkya-on 118:22-23

Kehtaq Lé Kang Kat Byî É Hkyô*

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yú râ matú, Hparishe pé ra-am eq Herut é byu pé ra-am lé, Yesuq chyáng nhang kat akô.

¹⁴ Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byî é za, Garai Gasâng é hkyô lé, tengmán é dông mhoqshit é sù nghut ri. Haú mù, Kehtaq lé kang kat byî le gi, ge lhê lúhú? ¹⁵ Ngamoq kat ra râ lúhú? A kat ra râ lúhú?" ga Yhang lé taí akô.

Yesuq kúm gi, yhangmoq, gegùn labyoq kut nyî kô é lé sé mù, "Nungmoq gi, haí mù, Ngo lé lé chyam wú akô lúhú? Denari ngùn rachap yu lé keq, ngò wú wú bá." ga taí kat ri.

¹⁶ Haú hkún, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lúhú?" ga myî ri.

Yhangmoq gi, "Kehtaq é nghut ri." ga tû taí akô.

¹⁷ Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myî Chyam É Hkyô

Mht 22:23-33; Luk 20:27-40

¹⁸ Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. ¹⁹ Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri. ²⁰ Hí hpyang lé, gumang nhiktâng wuì nyhit yuq nyi akô. Lagám yuq

* 12:12 Kehtaq gâ é gi, "hkoséng" gâ é nghut lhê.

gi, myiwe yù luî, zo dù a dap é za shi ló byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haû eq rajung za dut byuq bê nghut ri. ²² Haú nhiktâng wuî nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri. ²³ Haú mù luî, haû dum dui toq é buinyì má, myiwe myhí haû gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú? ²⁵ Haú shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ²⁶ Shi é mai dum lhoq dui toq é hkyô eq séng luî, Mosheq kê tô é laiká má lháng, haû nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'[☆] ga kê tô é lé, nungmoq a nghap wú kó lhú? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taî ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sará rayuq gi, lé lô mù, yhangmoq taî htîng lhum nyi kô é lé, lé wó gyô ri. Yhang gi, haú bang lé, Yesuq rago tû taî nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myî ri.

[☆] 12:26 Htoq Ló 3:6

²⁹ Haû jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhông é Yhumsîng Garai Gasang za, Garai Gasang nghut lhê. ³⁰ Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq, náng é wum-o banshoq èq, chyitdap râ lhê. ³¹ Haû htang lhum gi, 'Náng gûng lé nàng chyitdap é su, náng é chyangnâm mâ é bang lé le chyitdap aq. ³² Haû htang lhum gi, 'Náng gûng lé nàng chyitdap é su, náng é chyangnâm mâ é bang lé le chyitdap râ lhê. Shî í lhûm htoq kô é tarâ gotû a joq lo." ga yhangmoq lé tâ tâ ri.

³² Haû hkûn, tarâ sará haû yuq gi, "Gyo naû bê, Sará ê! Garai Gasang rayuq za nghut lhê, gotû a nyí lo ga nàng tâ é gi, têng ri. ³³ Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gûng lé nàng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga tâ ri.

³⁴ Yesuq gi, yhang hpaqchyî bo é dông tâ tâ nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé tâ kat ri. Haû hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé tâ é dang gi, "Haî mù, haû tarâ sará pé gi, Hkrisduq lé, Dawiq é yhangzo za nghut lhê gâ akô lhú? ³⁶ Dawiq gi, Chyoiyúng Woi-nyí èq táí nhang é má, 'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga tâi ri.[☆]
 gâ ri. ³⁷ Haû mù, Dawiq yhang lhang, Hkrisduq lé, Yhumsîng gâ é nghut le gi, yhangzo za hkâsu ge nghut râ lhú?" gâ ri.

Byù hpûng mó gi, Yhâng é dang lé, gabú myit èq gyô nyi bum akô nghut ri.

³⁸ Yesuq gi, mhoqshit uchyang tâi é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luî, gài pé má lhom shi-kyâm yù râ lé le, ³⁹ tarajong pé mâ é ahkyak dik é zùng jang pé eq poî pé mâ é réng é zùng jowò pé má myang zùng râ lé le, ô nau nyi bum akô. ⁴⁰ Yhangmoq gi, chuimó pé é yhûm-yò pé lé hpyoq zo hpyoq shuq kôluî, kyû hîng hîng dîng shit mhaú é bang nghut akô. Haû su é bang gi, dam byî é je riyhang hui zo kó râ nghut lê." gâ ri.

Chuimó Myhí Kat É Alu Ngùn

Luk 21:1-4

⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô. ⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za tâi kôlé, shî myung é chuimó myhí gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga tâi ri.

☆ 12:36 Hkya-on 110:1

13

Ló Htâng Buinyì Má Dut Lò Râ Hkyô

Mht 24:1-21, 29-35; Luk 21:5-33

¹ Yesuq, noqkuq yhûm mai htoq ló é hkûn, Yhâng é chángzo rayuq gi, "Sarâ ê, wú aq; hkâ-í ko é luqgok pé! Hkâ-í hkik é yhûm pé!" ga Yhang lé taí kat ri.

² Haú hkûn, Yesuq gi, "Nàng, yhûm mó shí pé lé myàng lhê a nghut lhú? Luqgok shí pé gi, rachâm htoq racham lháng a kê lhum loshoq, hpyoq hpyi pyâm é hui râ nghut lhê." gâ tû taí ri.

³ Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴ "Haú hkyô pé gi, hkâ-nhám dut lò râ lhú? Haú dut lò râ hkûn, hkasû é kumlhá htoq lô râ nghut lhê lhú? Ngamoq lé taí kyô wú laq." ga Yhang lé baú myî akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyì keq. ⁶ Hkâsu mù gâ le, 'Ngò gi, haú yuq* nghut lhê.' ga, Ngá myîng lé lîng é byù myo myo pô htoq lô mù, byù myo myo lé shuí nghoq kó râ nghut lhê. ⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dân kó. Haú hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi. ⁸ Byù ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuíhke jamjau hkyo é apûn awang za ru nghut ashí.

⁹ Nungmoq gùng nungmoq sidiq nyì keq. Hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, tarajong pé má nungmoq

* 13:6 Haú yuq gâ é gi, Hkrisduq lé gâ é nghut lhê.

lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wuì eq hkohkam pê é hí má, saksé đông yap ra kó râ nghut lhê. ¹⁰ Haù gabú danglù gi, amyû banshoq lé hí hko kyo ra râ nghut lhê. ¹¹ Nungmoq gi, chyup yu é hui luì, jep huì é hkùn, haì taí râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haù Chyoiyúng Woi-nyí eq taí nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuì gi, mó wuì lé gumlau toq mù, sat pyám nhâng kó râ nghut lhê.

¹³ Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhang, jiktâm jé shoq wó hkam jân nyí é sù gi, hkyi yu é hui râ nghut lhê.

¹⁴ 'Haù lhoq hten lhoq hpyoq é achag achyut hkyô'☆ gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpanq doq ló kó sháng gaq.

¹⁵ Yhumhkûng htoq má nyi tô é sù gi, yhúmhmau mâ é zè haì lé le, a ló gyó wang yù lo sháng gaq. ¹⁶ Yò má nyi tô é sù gi, yhâng é buhîng lé a ló taù yu nyì lo sháng gaq.

¹⁷ Haù buinyì pé má, zogùng dut é myiwe wuì eq naù huq ashî nghut é înu wuì gi, hkâ-í yhang wuîhke bekó nghut ri myhi-nhung. ¹⁸ Haù hkyô gi, gyoqmyò má a dut sháng gaq, kyûdûng nyì keq. ¹⁹ Hkâsu mù gâ le, Garai Gasang, mingkan lé hpan tô é hkùn mai ahkuì jé shoq, hkâ-nhám le a dut wú shî é wuîhke jamjau mó gi, haù buinyì pé má dut lò râ nghut lhê; haù su é hkyô gi, htàngnùng má hkâ-nhám le dum dut lo râ a nghut. ²⁰ Buinyì haù pé lé, haù

Yhumsîng Garai mai a lhoq shaù é nghut le gi, ó yuq le

☆ 13:14 Dan 9:27; 11:31; 12:11

asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyì haú pé lé, Yhang lhoq shaú pyám byi bê nghut ri. ²¹ Haú ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjíng kó. ²² Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê.

²³ Haú mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê.

²⁴ Buinyì haú pé má, wuîhke jamjau haú pé lai é htâng, 'Bui gi, noq byuq mù, lhamó gi, a tsô dut byuq râ nghut lhê;

²⁵ kyî pé gi, mauhkûng mai byit gyó lo bùm mù, mauhkûng má é wum-o a-tsam pé gi, lhoq nhûn é huî bùm kó râ nghut lhê. [☆]

²⁶ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shing kang eq le, gyó lé lo é lé, byu pé byu-myàng kó râ nghut lhê. ²⁷ Hau htâng má, Yhang gi, Yhâng é maumang lagyô pé lé nhang kat mù, maumyî chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsíng yù nhâng râ nghut lhê.

²⁸ Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ²⁹ Haú eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq. ³⁰ Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. ³¹ Mauhkûng eq myigùng

☆ 13:25 Esai 13:10; 34:4

gi, a joq lo dut byuq râ nghut lhê; nghut kôlhang, Ngá é dang gi, ru joq nyî râ nghut lhê.

Haû Buinyî Eq Ahkyíng Lé, Ó Le A Sé

Mht 24:36-44

³² Buinyî eq ahkyíng haú lé gi, ó yuq le a sé; mauhkûng htoq mâ é maumang lagyô pé lháng a sé; haû Zo le a sé; haû Îwa za ru sê lhê. ³³ Haû mù, nungmoq gi, ahkyíng haû hkâ-nhám jé râ lé, a sé kô é yanmai, sidiq nyî keq! Machya nyî keq! ³⁴ Haû gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byî to mù, hkum zúng sù lé le, machya nyî râ matú pying to luî, yhâng yhûm lé, haû dui-nhâng zoshâng wui chyáng ap pyâm to mù, byìn we shut htoq lô byuq é sù eq pung ri.

³⁵ Haû mù, haû Yhumsîng hpó gi, myíntâng laq, myín gunggàm laq, woqtûn hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyî keq.

³⁶ Haû a nghut jáng, Yhang, dân loq tung tau jé lo é hkûn, nungmoq yhup myhî tô é lé, lo myang pyám râ nghut lhê.

³⁷ Ngò, nungmoq lé, 'sidiq machya nyî keq,' nghû taî é eq rajung za, yuq hkangmó lé le, taî é nghut lhê." ga taî ri.

14

Yesuq, Xû But Byi Huî É Hkyô

Mht 26:1-16; Luk 22:1-6; Yhn 11:45-53; 12:1-8

¹ Ahkuî, haû Lhoqlhai Poî eq múnci a kat é Muk Zo Poî jé râ í nyî za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô ho nyi akô nghut ri. ² Nghut kôlhang, yhangmoq gi, "Byu pé gabyông lô kó abe, poî gyoro má gi, a kut shi sháng." ga taî akô.

³ Yesuq gi, Behtani wà má nyi é manggâm dap wú sù Simûn é yhûm, siboî má nghe zung tô é hkûn, myiwe

myhí rayuq gi, nardu amyit mai za saî yu é, gyai hpaû é namngón xû bo é alabasta (luq hpyû) bông yu lé lô mù, bông haú lé lêng hkyui luî, namngón xû haú lé Yesuq é ulhum má hut gyun byî ri.

⁴ Haú má nyi tô é bang ra-am gi, wú nhik-yô é myit èq, rayuq eq rayuq taî lhum kô é gi, "Haî mù, namngón xû lé aha agó kut pyâm lhê laq? ⁵ Haû namngón xû lé, denari* sùm sho èq ung luî, myùng bang lé byî le ge lhê mhaî!" gâ akô. Yhangmoq gi, myiwe myhí hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haî mù, yhang lé i-myt lhoq myo nhang nyi akô lú? Yhang gi, Ngá é ahtoq má ge é hkyô kut bê nghut ri. ⁷ Haû myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyi nyi râ sù a nghut. ⁸ Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê. ⁹ Ngò, nungmoq lé teng za taí kôlé, haû gabú danglù lé mingkan gón hko kyô é jowò hkanmó má, yhang lé myit bûn é dông, yhang kut é hkyô shî lé, taî kyo bekô râ nghut lhê." ga taî kyo ri.

¹⁰ Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pè chyáng e ri. ¹¹ Haú bang gi, haú hkyô lé lhom wó gyo kôjáng, gyô gabú luî, yhang lé ngùn byi râ ga, danggidiq byî akô. Haû mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

* 14:5 Denari rachap gi, byù rayuq é ra-nyí lhê é zuihpau eq wuí ri.

¹² Haû htûngli joq é eq rajung za, Lhoqlhai Poî hkungga sauzo jaú byî é, múncchi a kat é Muk Zo Poî sâng-hi nyí má, Yesuq é chángzô pé gi, Yesuq lé, "Nàng zo râ Lhoqlhai Poî lé, ngamoq hkâmá ê món to râ lú?" ga myî akô.

¹³ Haû mù, Yhang gi, chángzo í yuq lé, "Nungnhik, myuq hkaû shut wang ló keq, wuì yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq. ¹⁴ Haú yuq, wang ló é yhûm mâ é yhumsîng lé, 'Ngò, Ngá é chángzô pé eq rahá, Lhoqlhai Poî lé zo râ bíng wap hkâmá nghut lhê lú ga, Sará myí nhang kat ri.' nghû táí keq. ¹⁵ Haú hkûn, hen to gû nghut é, ahtoq mâ é wap mó lé lhom tân shit râ nghut lhê. Wap haú má, nga-nhûng é matú ê hen to keq." ga táí luí, nhang kat ri.

¹⁶ Chángzo haú nhik gi, htoq e ló mù, myuq hkaû má wang e ló le, Yesuq táí kat é eq roq za é myâng kômù luí, Lhoqlhai Poî lé, món to bekô nghut ri.

¹⁷ Myinhâng jé lô jáng, Yesuq gi, haû chángzo raxe í yuq eq rahá, haú má lé jé bekô nghut ri. ¹⁸ Yhangmoq gi, siboî má nghê mù, zô nyi bùm kô é u lé, Yesuq gi, "Ngò, nungmoq lé teng za táí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê." ga táí ri.

¹⁹ Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaî?" ga Yhang lé myî akô.

²⁰ Haú hkûn, Yhang gi, "Haú yuq gi, haû raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê. ²¹ Haû Byu Yhangzo gi, Yhang eq séng luí kê tô é eq rajung za, shî râ za nghut lhê. Nghut kôlhang, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkyá-on luí, muk lé myhik hpé mù, "Shî gi, Ngá é

gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

²³ Hau htâng, Yhang gi, góm lé le, yù mù, jeju hkya-on luî, yhangmoq lé byî ri; yhangmoq banshoq bang gi, haú lé yù shuq akô nghut ri.

²⁴ Yesuq gi, yhangmoq lé, "Shî gi, byù myo myô é matú htoq pyâm é, dangshikaq eq sêng é Ngá sui nghut lhê.

²⁵ Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyì a jé jé, tsibiyiq wing lé dum shuq râ a nghut lo." ga taî ri.

²⁶ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhâng bang gi, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau pé gi, lhoq pyo pyâm é hui kó râ nghut lhê.'[☆]

ga kâ tô ri. ²⁸ Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló lánng râ nghut lhê." ga taî ri.

²⁹ Haú hkún, Petruq gi, "Góbang banshoq myit lingbat kôlhâng, ngò gi, myit lingbat râ a nghut." ga taî kat ri.

³⁰ Haú mù, Yesuq gi, "Ngò, nàng lé teng za taí lé, hkû-nyí, hkû-myîn yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê." ga tû taî ri.

³¹ Nghut kôlhâng, Petruq gi, "Ngò, Nàng eq rahá shî râ dut kôlhâng, Nang lé ngò he-ngik pyám râ a nghut." ga zuq zuq taî ri. Góbang banshoq le, haú su ga châng taí bum akô nghut ri.

[☆] 14:27 Zhk 13:7

*Get-samane Gâ é Jowò Má Kyûdûng É Hkyô**Mht 26:36-46; Luk 22:39-46*

³² Yhangmoq gi, Get-samane gâ é jowò má jé lô kômù, Yesuq gi, Yhâng é chángzô pé lé, "Ngò, kyû ê dúng nyi é u lé, shí má zùng lánq keq." ga taí ri. ³³ Yesuq gi, Yhang eq rahá Petruq, Yakuq, Yohan pé lé, shuí chûng ri. Haú hkûn, Yhang gi, myit gyai a ngón é eq myit wuîhke é hui mù, ³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyâ luî, shí má lánq nyî keq." ga taí ri.

³⁵ Yesuq gi, haú mai ratsuí zo sô ê mù, myigùng má gop byên to luî, ahkyíng haú lé ge lhoq lhaî pyám byî le gi, Yhâng chyáng mai lhoq lhaî pyám byi râ matú, ³⁶ "Aba,† Âwa ê, Nàng gi, haî le wó dut é Sû nghut lhê. Góm‡ shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

³⁷ Hau htâng, Yhang gi, Yhâng é chángzô pê chyáng dum taú lo le, yhangmoq yhup myhî to kê é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lhú? Razup za lháng a wó machya nyi lhú? ³⁸ Gunglaú é a hui sháng gaq, machyâ luî, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

³⁹ Yesuq gi, radàm dum ê mù, hí lé dúng é dang lé za, ê dung ri. ⁴⁰ Yhang dum taú lo le, yhangmoq gi, myoqkuq lai kê é yanmai, yhup myhî to lánq kê é lé, lo dum myang ri. Yhangmoq gi, Yhang lé haî taí râ a sé dut byuq akô nghut ri.

⁴¹ Yesuq gi, sum dâm nghû râ lhîng má, yhangmoq chyáng dum taú jé lô mù, yhangmoq lé, "Nungmoq gi,

† 14:36 Aba gâ é gi, Aramaik dang dông "Âwa" gâ é lichyúm nghut lhê.

‡ 14:36 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

ahkuê jé shoq yhup ngón nyi ashî kó lhú? Gé bê! Haû ahkyíng gi, jé bê nghut luí, haû Byu Yhangzo gi, yubak dap bâng é loq má ap pyâm é hui râ nghut bê. ⁴² Toq keq! Ló losháng hko! Ngo lé ap pyám râ sù gi, jé lé lô bê nghut ri." ga taí ri.

Yesuq, Chyup Yû Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dáng nyo nyi ashî u lé, haû chángzo raxe í yuq má bo é Yudaq gi, haû hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyâm râ sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yû mù, zúng shuí ló keq." ga kumlhá byî to bê nghut ri. ⁴⁵ Yudaq gi, Yesuq chyáng hkyê za ê mù, "Rabai ê." ga taí luí, Yhang lé bopuq puq byî ri. ⁴⁶ Haú hkûn, yhangmoq gi, Yesuq lé chôm zûi zìng mù, chyup yû bekô nghut ri. ⁴⁷ Haû mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lhú? ⁴⁹ Ngò gi, nyí wuí, nungmoq eq rahá nyi luí, noqkuq yhûm má mhoqshit byî nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúmdang pé gi, dik ra râ nghut lhê." ga taí ri. ⁵⁰ Haú hkûn, haû chángzô pé gi, Yesuq lé tô pyâm to kôluí, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchîn hpang ló byuq bê nghut ri.

*Yudaq Byìn Tú Wapdoq Má Jéyáng Huî É Hkyô**Mht 26:57-68; Luk 22:54-55, 63-71; Yhn 18:13-14, 19-24*

⁵³ Yhangmoq gi, Yesuq lé, hkyangjong mó chyáng shuí e akô; haû hkyangjong agyi pé lhunglhâng bang, suwún wuî eq tarâ sará pé le, lé zup zîng bum akô. ⁵⁴ Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, haû má, zúng bang eq rahá, myihkyóm yâm má gyoq gang zung tô ri.

⁵⁵ Haû hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri. ⁵⁶ Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saî é noqkuq yhûm shí lé, Ngò hpyoq hpyi pyám mù, sum nyí gyoro má, byu loq èq a saî é, gotû ralhum dum saî râ nghut lhê.' ga taî é lé, ngamoq wó gyô ri." ga akô. ⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haî le a tû taî luq? Shí bang, Nang lé mara hun nyi é saksé gi, hká dông nghut lhê lhú?" ga luî, Yesuq lé myî ri. ⁶¹ Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lhú?" ga dum myî ri.

⁶² Haû hkûn, Yesuq gi, "Nghut lhê; haû ngò Byu Yhangzo gi, a-tsam bo dik Su é loqyo hkyam[§] má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga taî ri.

§ 14:62 Loqyò hkyam gà é gi, ahko ahkáng wó é jowò lé gà é nghut lhê.

* 14:62 Mhuthtui ji mù, mauhkûng mai lé lo é gà é gi, Danielaq 7:14 má bò lhê.

⁶³ Haú hkûn, hkyangjong mó gi, yhâng é bu lé lâng cheq pyám mù, "Nga-nhúng, hai saksé râ ashî lúh? ⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lúh?" ga myî ri; yhangmoq banshoq bang gi, shî gíng sù nghut ri ga, chôm myit huî akô. ⁶⁵ Haú mù, ra-am gi, Yhang lé sôkan byé gyun é eq, myoq má nghop pyám byi luî, loqtsup èq htui byî lhê kut mù, "Nang lé ó yuq htui é, myiqhtoi htoî wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaû má nyi tô é u lé, haú hkyangjong mó é dui-nhâng zoshâng myhí rayuq jé lé lo ri. ⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

⁶⁸ Nghut kôlhâng, yhang gi, "Nàng taí é hkyô lé, ngò, sé le a sé, gyo le a sê gyo." ga he pyám luî, wâng hkúmdong shut htoq e ló bê nghut ri.†

⁶⁹ Dui-nhâng zoshâng myhí haú gi, Petruq lé, haú má dum myàng jáng, awui ayàm má yap tô é bang lé, "Shí yuq le, haú hpúng má lom é sù rayuq nghut ri." ga dum taí ri.

⁷⁰ Petruq gi, radàm dum he pyâm ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê." ga taí akô.

⁷¹ Haú hkûn, yhang gi, yhânggùng yhang nhing luî, "Haú nungmoq taí é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tân shimá, nàng, Ngo lé

† 14:68 Chyúmding ra-am má Haú hkûn jáng, woq tân bê nghut ri gâ é le bo ri.

sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haû napkyó noq za má, hkyangjong agyi pé gi, suwún wuî, tarâ sará pé, Yudaq byìn tú wapdoq gón bang eq rahá kut, chôm bóng yû kômù, Yesuq lé tuî yû luî, shuí htoq ê kômù, mauzau Pilat chyáng ê ap byî akô nghut ri.

² Pilat gi, Yesuq lé, "Nàng gi, Yudaq byu pê é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga, tû taí ri.

³ Haû hkyangjong agyi pé gi, Yhang lé mara gyai myo shoq chôm hun akô. ⁴ Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, hái le a tû taí lhú?" ga myî ri.

⁵ Nghut kôlhang, Yesuq gi, hái le a tû taí kut jáng, Pilat gi, maú byuq bê nghut ri.

⁶ Haû Lhoqlhai Poî u lé, mingbyû wuî dúng é htóng byû rayuq yuq lé, mauzau mai lhaq lhoq htoq byi byi kut é htông joq ri. ⁷ Haû hkûn, Barabaq gâ é byû rayuq gi, gumlau gabyông é hkûn, byû sat é gumlau bang eq rahá, htóng gyó tô ri. ⁸ Byû hpûng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haû mù, yhang gi, "Yudaq byu pê é hkohkâm lé nhang htoq kat byi râ lé, nungmoq ô nau akô lhú?" ga myî ri.

¹⁰ Pilat, haû su ga myî é gi, haû hkyangjong agyi pé, Yesuq lé manôn kôluî, yhâng chyáng lé ap byi kô é hkyô lé sê é yanmai nghut ri. ¹¹ Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng

dung kó sháng gaq ga, haû byù moq mó lé i-myait lhoq toq byî akô.

¹² Pilat gi, "Haû jáng, nungmoq mai Yudaq byu pê é hkohkâm ga sù yuq lé, ngò hkâsu kut râ lhú?" ga yhangmoq lé myî ri.

¹³ Haû hkûn, yhangmoq gi, "Yhang lé tapzîng má jén sat pyám aq." ga chôm garu akô.

¹⁴ Haû jáng, Pilat gi, "Haî mù luî lhú? Yhang haî kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

¹⁵ Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byî kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuî wang ló kômù, gyedap gón lé ji tsîng yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saî yù kôluî, Yhâng é ulhum má tsung byî akô. ¹⁸ Hau htâng, yhangmoq gi, "Yudaq byu pê é hkohkâm hpô è! Chyung hîng xê hing nyî sháng gaq ô!" ga wut garû akô. ¹⁹ Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luî, Yhâng hí má hkyihput htuq mù, paî mhaû akô nghut ri. ²⁰ Yhangmoq gi, Yhang lé rhoi jihkyoî ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luî, tapzîng má jén sat pyám râ matú, Yhang lé shuî htoq e ló bekô nghut ri.

Yesuq Lé Jén Pyâm É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haú jowò mai laí ló ri. Haú hkûn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuî e akô (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura* eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluî, Yhâng é mebu pé lé, hkyîn shosé shê mù, âng é đông gam yu pyám byî akô nghut ri.

²⁵ Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é đông kê tap to kê é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaî hkyam shut rayuq kut, tapzîng htoq má jén tap tô akô nghut ri. ²⁸ (Haú gi, "Yhang gi, yubak dap bâng chyáng nghap lhôm é hui bê nghut ri."☆ gâ é Chyúmdang lé lhoq dik é nghut ri.)† ²⁹ Hkyô sô laí ló é bang gi, nyhap é đông u-ngut ngut mù, taí kê é gi, "Noqkuq yhûm lé hpyoq pyám luî, sum nyí gyoro má dum wó saî lhê ga Sù ê! ³⁰ Náng gùng nàng hkyi yù luî, tapzîng mai gyó lò wú aq mhaî!" ga akô nghut ri.

³¹ Haú eq rajung za, hkyangjong agyi pé eq tarâ sará pé le, yhangmoq hkaú má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! ³² Nga-nhúng wó myâng mù, lumjîng râ matú, shî, Israelaq byu pê é hkohkâm, Hkrisduq

* 15:23 Mura gi, chi wó kut jung xû nghut lhê. ☆ 15:28 Esai 53:12

† 15:28 Bun zo shî gi, chyúmding axau ra-am pé má za bo é nghut lhê.

gi, tapzîng mai gyó lo wú sháng gaq." ga, Yhang lé rhoî dang taî akô. Yhang eq rahá tapzîng má jén tap to huî é su nhik le, Yhang lé rhoî dang taî akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri.

³⁴ Myinhâng sum hkyíng jé é hkûn, Yesuq gi, "Eloi, Eloi, lama sabakhtani."☆ ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nàng, haî mù, Ngo lé tô pyâm tô lhê lhú?" gâ é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taî akô.

³⁶ Haú hkûn, byù rayuq gi, din e ló mù, wuìmaù lé tsibiyiq wing chyín má jum yù luî, jàm-yang má tuî tap mù, Yesuq shuq sháng ga yhun byi luî, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taî ri.

³⁷ Yesuq gi, htê mó èq garû kat luî, kâng byit byuq bê nghut ri.

³⁸ Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taî ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byî é

☆ 15:34 Hkya-on 22:1

bang nghut akô. Yesuq eq rahá, Yerusalem wà mó má doq lé lo é myiwe wui, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyí) nghut ri. Haú mù, myinhâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé lánng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé é dîng ri. ⁴⁴ Pilat gi, Yesuq shî bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shî teng bê lhuú ga myí ri. ⁴⁵ Shî teng bê hkyô lé, shô up gyezaú chyáng mai wó sê yù jáng, Pilat gi, Yesuq é gungsôm lé yù rà ahkáng, Yosep lé byi kat ri. ⁴⁶ Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaú má ê kat tô ri. Hau htâng, yhang gi, luphkum má, luqlông èq lhêng chí pyâm tô ri. ⁴⁷ Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi rà matú namngón jung ê wui akô. ² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyám byi rà lhuú?" ga, rayuq eq rayuq taí lhum akô.

⁴ Nghut kôlhang, yhangmoq tu wú kat kô é hkûn, luqlong haû gi, lhoq lhêng to láng é lé, myàng akô nghut ri; luqlong haû gi, gyai kô é nghut lhê. ⁵ Yhangmoq gi, lup hkaû má wang ê kô é hkûn, hpyu é buhíng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haû hkûn, haû yuq gi, "Hkâgyuq dân kó! Nungmoq gi, haû tapzîng má jén sat huí é, Nazaret wà byù Yesuq lé ho akô, a nghut lhu? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq. ⁷ Ahkuî, nungmoq gi, ló mù, 'Yesuq gi, nungmoq hí má, Galile mau shut so láng râ nghut lhê. Nungmoq lé, Yhang taí tô é eq rajung za, nungmoq gi, Yhang lé haû má ló myâng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri.

⁸ Haû mù, myiwe myhí haû bang gi, byòdàn gyuq nán é eq, lup mai hfang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mâ é Mariq lé hí htoq shit ri. ¹⁰ Mariq haû gi, ló mù, haû Yesuq eq nyi laí lò bê bang, yón ngau nyi kô é hkûn, haû hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jíng kó nghut ri.

¹² Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri.

¹³ Haû nhik gi, taû lò mù, gotû chángzô pé lé haû hkyô lò

shit kyo akô; nghut kôlhang, yhangmoq gi, haû lé le a jing byi kó nghut ri.

¹⁴ Hau htâng má, Yesuq gi, haû chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jàm shoq htoq ê mù, waxâng zo wuî lhunglhang lé, haû gabú danglù hko kyo keq. ¹⁶ Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjing é sù ó yuq nghut kôle, mara byi é hui râ nghut lhê. ¹⁷ Lumjing é bang wó kut shit râ kumlhá pé gi, Ngá é mying lé lang luî, nat gâng pé lé wó hkat htoq kó râ eq laklaí é mying pé lé dat nyò kó râ nghut lhê; ¹⁸ yhangmoq gi, lhangmuî pé lé le, wó kui zui kó râ nghut lhê; muî shi jung duq lé, shuq kôlhang, haî dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haû Yhumsing Yesuq gi, yhangmoq lé dang ban taí é htâng má, mauhkung shut shuî toq yu é hui luî, Garai Gasâng é loqyo hkyam má zung to bê nghut ri. ²⁰ Hau htâng, haû chángzô pé gi, htoq ê mù, jowò hkangmó má mungdang ê hko kyô akô nghut ri; haû Yhumsing gi, yhangmoq eq rahá nghut nyi mù luî, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 17 Nov 2018 from source files dated 20 Jan 2018

23f9fc55-a8a4-59ef-9513-707ec336b0ee